


~ 16  
2696  
21













懷麓堂文後稿卷二十六

誌銘

明故太傅兼太子太傅平江伯陳公墓誌銘

公姓陳氏諱銳字志堅其先自潁川徙廬之合肥高

祖諱聞元季以鄉兵內附從高皇帝下江南累功至

成都衛指揮同知曾祖諱瑄累功至右軍都僉事從

文皇帝靖難封奉天翊運宣力武臣特進榮祿大夫

柱國平江伯總督漕運議罷海漕通濟寧運河功最

多命子孫世襲賜誥券追贈三代卒贈平江侯謚恭

襄勅有司廟祀清江浦祖諱佐代早卒考諱豫正統

昭和十年一月三日購求



間以平福建叛賊功進封侯再贈三代景泰間城臨  
清守備南京再鎮臨清卒贈黔國公謚莊敏仍勅有  
司卽其地廟祀之黔國之卒也公方奉太夫人某氏  
居南都奔喪歸葬乃襲封時天順甲申歲也成化乙  
酉憲廟知其才命領三千營分司轉奮武營兼領禁  
衛賜蟒衣鎧甲諸物戊子太夫人喪予告歸葬庚寅  
佩征蠻將軍印總鎮兩廣號令明肅前後勦蠻賊三  
千餘級俘賊黨及還所掠者倍之賜勅獎諭名益起  
會漕帥闕移鎮淮揚增拓濟寧諸牖修淮安二衛城  
及高郵諸湖隄構屋數百間以居貧民歲大疫遣醫

分療給米千餘石爲糜所活甚衆死者以官地瘞之  
武官新襲者遣入儒學給以筆札生儒應試者具官  
舟資送之部領有疾躬往撫視漕卒餘丁出應公役  
請予之糧越十有三年條具便宜事百餘疏多見施  
行嘗言通州至都城恒困陸輓請因元會通河舊蹟  
浚河增牖以通運舟功甫就緒舟果有至者上遣中  
使勞以羊酒有不便者造浮言沮之遂罷其役旣而  
命掌南京中軍都督府事弘治戊申今皇帝召入督  
神機營兵爲掌左軍都督府轉五軍營簡教有則恩  
威並著甲寅河決張秋公與太監李公興副都御史



劉公大夏奉命往治乃於上流塞黃陵岡荆隆口下則治滎澤孫家渡諸河七十餘里浚祥符四府營游河四十餘里俾諸水由歸德武平出宿遷小河口以達於淮疏賈魯河由曹縣梁進口以出徐州於是張秋決塞而運河始復其舊上賜名安平鎮遣行人勞以銀幣加公太子太保比還朝加太保兼太子太傅增歲祿二百石丙辰加太傅兼秩如故公請以所加秩重贈三代而繫國追賜號爲奉天翊衛推誠宣力武臣特進光祿大夫柱國皆異數也庚申敵犯大同急命公佩靖北將軍印統京營及諸路兵馬出討之

許以便宜行事時公病在告久聞警卽出朝力疾以往至則夙夜祇慎嚴爲部曲期以全制勝而精力已弗逮矣越數月召還蓋居閒二年而卒是爲壬戌十二月十五日壽六十有四上輟視朝一日遣官諭祭者七皇太子遣祭者一配沐夫人先卒已賜葬於江寧大山祖墓之次命有司啟壙窆公而夫人祔焉公性坦亮器度甚偉論壘壘不竭高自負抱遇事必爲宏綱闊制不斤斤徇束縛所至有能聲兵戎之外歷試累效若親王冊封皇太子冠皆預禮修皇陵都城建禮部皆董其役惟漕河事尤勞且久會通之議垂



成而罷而安平竟底成績蓋其講究區畫得諸家範者爲多兼尚文事通書史攻詩翰禮重喪祭撫庶弟鐸鎡及諸妹羣從皆爲婚嫁分所得祿以給族黨故舊窮乏者亦賙之好賢下士善遇官屬與人重然諾女許嫁周駙馬子庠庠忽邁疾幾殆周請公停婚公義不可人以是多之沐氏乃黔寧時靖王之孫無子子一熊出袁氏錦衣勳衛未請封女四孫女一公引發有日其中表弟譚公祐狀公行以熊來請銘予以成國朱公之故獲聯姻戚因慨念名家宿將之遺風聖天子用舊保終之盛德皆不可遂泯乃敘次其事

而系以銘銘曰國有列爵家有世臣孰開孰承惟視其人我明奮興羣策竝屈桓桓平江代有勳閥粵自聖祖逮於神宗中最著者恭襄之功恭襄有孫繫國有子人曰公才必復其始入學於師朝詩暮書出練於戎左浙右爰簪纓翹翹朝著之望闔幄嚴嚴干城之將南巡嶺徼虎旅成羣入領漕司萬艦如雲居重馭輕本兵斯寄帝曰汝才實任予事導堙障狂人曰公能有河會通有鎮安平彼胡陸梁公起授鉞載驅載歸盡瘁而沒帝曰汝心王室是於終則未究始乃有餘祭有備物葬有成式帝曰汝勞恩豈予惜鍾山



懷齋集  
在南下有高原祖考所在公歸其間難有苟避公我  
弗屑功有僞增公我寧闕持此校彼孰劣孰優公身  
雖亡志則未休舒華振英公子亦肖爲裘爲箕公有  
遺教公業斯存公子公孫有徵後來其在公門

明故奉政大夫修正庶尹雲南按察司僉事致

仕何公墓誌銘

郴州何公廷彥以雲南按察司僉事致仕歸十有八  
年卒於家其長孫孟春承重當終制乃具衰經請於  
予曰孟春旣喪吾父又喪吾祖孤不克自立惟先生  
嘗爲吾父銘顧於吾祖尤舊故宜無所復靳意者亦

吾祖意也言未畢涕泗交下跽弗能起予甚悲之乃  
據其所自爲狀以銘公諱俊廷彥字也少從宦遊  
於外比歸悉以資業讓諸兄力紹家學學且就授徒  
爲養養嫡母袁及母鄧以孝聞屢試弗售天順壬午  
舉湖廣鄉貢成化己丑登進士第時年已四十有三  
癸巳授南京戶部主事丁鄧安人憂丙申復任凡所  
領錢穀出納明辨而以廉慎將之稱能官者必指屈  
焉辛丑擢雲南按察司僉事兼督雲貴學校往復勤  
勵不避險遠其爲教令隨俗導化濟之以嚴凡所陶  
鑄多中器使初公以晚達無意進取爲按察時其子



說已以解元登進士遂慨然思歸然未卽遂居四年  
丙午乃得請去弘治戊申說爲刑部主事值今天子  
登極恩當封公例以本秩進階奉政大夫修正庶尹  
後孟春又登進士累官兵部員外郎署郎中公猶及  
見之而卒年七十有七矣公性開朗畦町不內設與  
人交必從厚聞有善雖細輒加獎借見窮乏危急則  
周之或背讒面毀者置而不問藹然有前輩長者之  
風旣謝事無他嗜好獨嗜醫富畜方藥每手製以施  
病者往往而效專家者顧弗逮焉所著有訥齋稿十  
卷配廖氏同郡名家女有懿範爲媼邨所歸年四十

有二而卒贈安人後加贈宜人繼李氏累封宜人子  
三說長而賢其卒也時論惜之次言次閻孫亦三孟  
春文思奇敏蒞事有賢俊聲次孟旦次仝孫公生宣  
德某年卒以弘治某年葬於某山之原公先世在宋  
出廬陵徙廣東宋有號都統者鎮郴桂其孫行三九  
者始居郴郴今有都統廟族人皆稱爲始祖公曾祖  
諱德翁篤行好義祖諱仁海世隱不仕考諱義堅舉  
鄉貢累官合州同知惠政在人公用家學取進士且  
以教四方學者如瑞州陳侍郎政王御史相皆以進  
士顯今物故且盡而公巋然齒德望於鄉郡壽考終



命得數之正其所積亦自厚哉銘曰自我而前爲鄉  
實自我而後爲國珍又以其餘淑後人我見其終壽  
獨存孰後我者其吾孫乎

明故襲封衍聖公以和墓誌銘

公諱弘泰字以和爲宣聖六十一代孫成化庚寅始  
襲封憲宗皇帝賜第京師命齒國學嘗見公所服玉  
帶遣人問焉公對曰臣家門故事累朝恩數不敢廢  
也許之再值郊祀分獻內壇皆出親定壬辰辭歸上  
若曰卿其進學循禮表率宗族無忝聖裔以副朕懷  
丙申給誥命有司以二品例授犀軸公言舊典以玉

軸爲異乃改授之丁酉詔加廟祭禮樂公率族人奉  
表入謝先世有遺田百餘年散業他姓者過半至是  
皆贖歸之以贍羣族己亥祖廟爲雨水所壞公請命  
有司修葺完麗如故今上登極以弘治戊申入賀上  
視學命分獻兗國公賜坐奠倫堂退率三氏子孫表  
謝復賜宴禮部及襲衣冠帶躬耕藉田亦預宴焉家  
居友愛交洽歲時遊宴相酬倡或夜分忘倦四方大  
夫士至者禮接不少衰己未公來朝聞祖廟災亟歸  
齋哭如居喪引咎自責居鬱鬱不樂庚申力疾而朝  
辛酉上疏乞休致上若曰卿其善自調攝以奉聖祀



所請弗許時復有修廟之役公協相規畫勞勩甚殷凡再越歲弗克躬覲事病既革執兄子聞韶手若有所屬者蓋公之封也廷議以爲世嫡相傳古今通義乃按宋故事俟公之後仍歸其兄之子公毋遺命亦以是公及見聞韶之成其乞休時嘗具名以請故至是猶惓惓云爾訃聞上特遣行人諭祭者五有司給棺槨工部官屬治葬事以某月某日寔焉公美風儀善論議每評騭人曲直料事當成敗多奇中俾有職務將無不可爲者而靜處優逸無由自見然承奉宗祀修治林墓綜制家政其在孔氏有勞績焉若孝友

無間之心剛毅不屈之氣榮名令聞偉然著於人人其在天下亦不可泯也嘗卽魯泮池遺址築東莊別墅因以自號有東莊稿藏於家公生景泰庚午四月二十七日卒於癸亥五月十五日年五十有四子與公內交久公以兄命爲聞韶議婚於予禮成之三年聞韶始嗣封爵則以父命奉狀請銘公墓嗚呼予乃遽爲公銘邪銘曰孔裔周啟爵以代崇六十一傳兄弟迭封公繼兄爵在先帝世歷春逮秋三十有四入主宗鬯俎豆載虔出奉朝獻禮儀孔閑時斯歲斯我職在茲我有餘力而弗外施功名始終天所優假我



所弗預疇其望者有命自君公荷弗墮有身自親公全厥歸維兄有子維祖有祀公所無憾庶其在此孔林北西公有世墓曷其祔之乃祖乃父公老在東公自爲宗公子公孫其來無窮

明故光祿大夫柱國太子太傅刑部尚書致仕

贈特進太保謚康敏白公墓誌銘

公姓白氏諱昂字廷儀常州武進人也景泰丙子舉南京鄉貢天順丁丑登進士第授南京禮科給事中嘗劾戶部尚書張鳳下之詔獄甲申改刑科成化戊子遷左給事中辛卯進都給事中嘗以災異言事謂

陛下卽位初詔罷貢獻停織造禁權勢抑異端而今皆不爲衰止願守大信以令天下御史謝文祥以言事獲罪率諸寮救之壬辰擢應天府丞適署掌府事興學政定義役乙未改南京大理寺少卿辛丑遷南京都察院左僉都御史兼督巡江有劇賊劉通出沒海上東南騷動公調兵所要害窘而招之通身自納款公諭遣歸率其餘衆以降乃執通送京師徐悉釋不問進右副都御史甲辰署掌院事丁未擢南京兵部左侍郎鳳陽祖陵圯公與平江伯陳公銳往修之方歲歉民困重役公調度得所二年而事集又以餘



財賑饑民顧德之弘治己酉河決原武改公戶部右侍郎治之公簡率官屬築陽武長隄以防張秋引中牟之決以入淮浚宿州古睢河以入泗又多爲渠堰於徐兗瀛滄之間以殺河勢又開複湖於高郵隄東以避風濤之險其功甚勞歸改刑部辛亥攝都察院事遂擢右都御史令御史出按歲報有司賢否狀且視所報當否而殿最之請籍天下軍伍以便勾稽籍天下田數值水旱則視高下以蠲其稅癸丑進刑部尚書壹意矜恤凡情涉矜疑者多獲平反時法司苦條例繁公奉詔會官刪定頒中外行之甲寅加太子

少保戊午進太子太保加光祿大夫柱國賜麒麟服已未在告上遣中官挾醫問疾賜上尊少牢蔬米諸物再乞休致復加賜問免朝謁令善調攝起視事庚申疏累上乃許之進太子太傅賜勅給驛給月俸輿隸以歸癸亥七月某日卒壽六十九訃聞上念公舊勞贈特進太保謚康敏賜棺槨遣官諭祭者九命有司治葬事公性度宏裕持議常依於厚善哀高益卑因事爲功決機應變無所疑滯待人際物各當其分上自王公下逮胥徒僕從見之無不意滿或以緩急叩之輒力爲排解無所卹居官四十餘年未嘗有怨



於人人亦無怨之者然惟公能之他人弗能也居家  
孝睦事繼母甚謹弟昇早世卹其二孤以縈爲戶部  
書筭廕垣爲國子生置田以贍貧族立義塾以教羣  
子弟置局儲藥鄉隣疾病者多歸焉比歸不問世事  
園亭賓客甲於畿甸放歌痛飲以終天年世所稱五  
福者殆兼之矣嗚呼難哉銘曰官有九品而極於一  
壽有百齡其稀七袞仕途險夷明者難必家之承傳  
疇繼疇述盈則易虧滿則易溢迷先得後有始無卒  
兼是數者指詎多屈耳目所逮公在甲乙有猷有功  
有名有實曷其致之迪惠斯吉彼弗惠者自貽伊疾

蓋棺事定是謂永畢尚有遺恩光昭贈卹樂哉斯丘  
永奠幽室

### 定國公墓誌銘

公姓徐氏諱永寧字克安世爲鳳陽人高祖達從太  
祖高皇帝爲開國元勳封魏國公追封中山王謚武  
寧世嗣公爵曾祖增壽左軍都督府左都督太宗文  
皇帝靖內難以死事功追封定國公謚忠愍曾祖姑  
實爲仁孝文皇后次代王安王二妃家極貴盛祖景  
昌始封定國公賜號推誠奉事武臣階榮祿大夫勳  
右柱國給誥券考顯忠嗣一門兩公蓋本朝所僅見



也公性敏喜讀經史通書法蚤失怙能隆師親友襲  
爵時年甫十有三儀觀秀偉景皇帝愛之嘗奉使秦  
伊二府殊見禮重歷事英宗睿皇帝暨憲宗純皇帝  
將嚮用忽遘風疾不克奉朝請久漸沈瞶聞出觀戶  
外有貴近臣怙恃驕縱道路側目莫敢近公奮擊之  
其人策馬走僅得脫若是者往往而然人疑公非病  
其中殆介介有白黑及問之輒失度時操筆折簡通  
親舊或作高昌西番字蓋其少所習者人益不能測  
也弘治甲子正月九日卒距其生正統辛酉三月十  
日壽六十有四上輟視朝一日遣官諭祭者再勅有

司給棺槨治葬事皆如制三月九日窆於都城西馬  
鞍山祖墓之次公側室丁氏真定衛指揮使源之女  
侍公病日夕不懈比卒沐浴易服縊於公之寢室死  
焉光祚以聞下禮部覆實詔旌其門曰貞烈其事最  
顯故附書之銘曰古爵五等今惟三公階最貴曼莫  
參下有侯伯無子男鐵券合契金書鏡河山帶礪國  
與咸父死子嗣限制嚴一門兩公世所瞻開國靖難  
勳名兼公生蚤歲頭角嶄蹶而弗振迤且淹朝謁雖  
廢祿尚儉以病自逸非荒耽盈虧謙益神所監祖德  
下被君恩覃公業有子箕裘堪世代圭組隨纓簪公



全歸之意已厭上耐祖考無遺慚先述後得數可占  
穹碑負當纒巖我銘其幽永不芟

封孺人楊母陳氏墓誌銘

楊孺人陳氏之喪其子給事中禡自爲狀泣而請予  
銘其敘事行曰吾母生而爲父母所愛歸吾父朴菴  
公時祖姑尚在性嚴急曲盡孝敬得其懽心喪居雖  
盛暑不脫衰絰諸叔之娶皆手爲繒綉吾父以儉致  
豐吾母勸分諸叔無弗裕者見人窘急必給以衣食  
每暮夜聞乞聲必呼取剩飯與之暑月則躬煮茶置  
道側以濟渴者天未明卽呼婢僕起治事有過則曲

爲掩護每食先問其有無或未給則食不下咽族鄰  
幼稚至輒與之果物爭攀索取不厭朝出雖鷄犬  
聞步履聲亦叫呼以迎若是者殆以爲常吾兄祚出  
爲商訓之曰小民賣魚菜自活獲利甚微銖兩勿與  
較見傭工客作亦溫言慰之未始加訶叱焉教吾兄  
弟動引古書句及諺語爲戒皆切中事理禡游庠校  
出試藩省輒戀戀不忍別比得官謝病歸省則曰汝  
壹意供職勿以我爲念知汝宦情亦薄須少報朝廷  
歸卽歸吾不汝強也禡再以使命至出所積遺吾兄  
弟諭之曰汝輩爲士爲商皆有成業惟汝庶弟糖幼



可厚給之蓋所以慰吾父者又如此尤人所難也且吾母之行無一弗可記者而隱於閭閻閨閣之間視不忍死以狀誰其知之者若金石之刻徵諸女德古亦有之而非荒迷者所能此視之所爲請也視以文行重於鄉舉湖廣鄉貢第一擢進士高等簡入翰林爲庶吉士歷禮刑二科給事中有諫諍聲此則予所知者因次第其狀而著其母德爲銘銘曰庸德之德德乃可久惟德之久可以不朽內則之則雖美弗彰匪子之揚之孺人其亡乎

封淑人吳母林氏墓誌銘

封淑人林氏予同年友戶部左侍郎吳公道本之配也公卒之十年卒於家其子夢麒走京師以其事聞朝廷遣官諭祭令有司啟壙合葬蓋異數也夢麒舊以父命學於予乃述母德以請曰吾父之葬先生幸爲銘今吾母將從吾父於地下銘曷敢他屬予哀其志而許之林氏與吳同出漳浦淑人生而貞順有則贈侍郎友松翁爲子擇婦得淑人族黨交賀淑人羞膳必謹友松家政尚肅且好賓客又置義塾以教鄉子弟百凡饋饗皆淑人手出諸叔之幼也爲之澣櫛巾服膏火之費有母道焉公壯而無子淑人爲置側



室林氏生夢麒財五歲抱寘膝上口授論語孝經諸書蓋其所素習者不失一字後携至京師遣就外傳時使人覘其所為或涉嬉縱輒加笞責及流涕復予之飴果而遣之若有疾則彷徨無措常所過從若他良士則喜為設具否則怒形於色居未始以靡麗之服加其身曰恐喪而志而能力學得祿他日不患無此服也病篤執夢麒手而慟曰吾生七十有五年封至三品死不恨恨不及而之成以畢吾志耳自是痿不能起猶以手指使遷居正寢更衣而逝夢麒事母孝雖尺布一錢未始不請及其喪也匍匐數千里請

命於朝君子傷之然能以家學舉鄉貢當繼得進士志業不墜雖公之澤亦淑人教也銘曰穆木在南小星在東維大夫之宗維國之風吳氏以國林望以族維人之良亦維人之淑內行不出孰譽其美我友其夫亦傳其子祭有藻蘋教有典墳有刑者存淑哉乎若人身所鞠子實所從老從夫九原百世是保

岳母孺人陸氏墓誌銘

弘治乙丑四月二十七日岳母孺人陸氏以壽終距其生永樂癸巳十一月十五日春秋九十有三矣孺人為需菴處士公諱端之配於我外舅蒙泉翁為岳



嫂自我翁之沒三十有四年中間處士沒我外姑宋夫人沒吾妻之姊若妹沒者前後相繼而孺人歸然獨存有子女各一人孫二人外孫女一人最久且盛至是乃卒蓋岳氏之老長於是乎盡予雖爲孺人幸之亦惡得不爲之哀之也耶我翁與處士公暨仲兄千戶詳從弟海共敦友愛旁睦羣族及諸子姓皆極恩意孺人實有助焉養姑之寡妹二十餘年預制棺歛卒襄後事其嫁南京戶部主事王璿早寡迎致於家曰以成而節且嫁其孤女于今萊州府通判任經曰以畢而志其他中表諸黨貧不能衣食婚嫁死不

能葬者多賴以濟翁交四方名士假屋講學踵接於家館私膏火之費皆其手給未嘗厭倦後多舉大魁登進士布列華要訪道舊故皆以嫂稱之且譽其賢無異辭焉翁之戍於甘也以宋夫人從孺人事太夫人劉氏曲致懽慰及遷於莆也俾其子坪侍之行諸女之嫁奩物饋具未嘗弗稱坪娶於曹氏生子梁及繫孺人愛不弛教肅然有故家風範蓋其自少至老無一日不治家務雖病卧床褥猶云云不絕齒德之茂誠近時所僅見也予道南京以翁命主於陸氏見其昆弟子姓富而好禮知孺人內行有自旣託媼屬



久而周旋其家雖欣戚事異而情禮不少殊孺人之  
喪卜以某日坪力疾來涕泣而請曰忍不爲吾母銘  
耶予以官守遺執紼之役亦惡忍不銘銘曰夫有主  
婦維德之耦家有壽母道乃可久人壽十衰茲過其  
九匪我能創亦我能守維族之望維業之茂所未竟  
者以遺厥後

懷麓堂文後稿卷二十七

誌銘

明故吏部尚書致仕贈特進太保謚恭簡尹公  
墓誌銘

吏部尚書尹公旣致仕十有八年卒於家上聞訃嗟  
悼遣官諭祭勅有司治葬事仍贈特進太保謚恭簡  
賜之誥命褒舊績也公姓尹氏諱旻字同仁世爲歷  
城宦族公七歲知讀書稍長下筆數百言正統丁卯  
舉鄉貢第一連擢戊辰進士簡入翰林爲庶吉士已  
已授刑科給事中景泰間值國多事屢有建白皆傳



正義天順丁丑遷左給事中英廟見其儀觀魁偉音吐洪暢欲大用之尋擢通政司右叅議轉左叅議己卯早代祀海岱禮成而雨庚辰持節封安南國王盡却餽遺國人斂服辛巳王師有事於陝西公出總軍餉有白金絲幣之賜壬午丁母艱癸未驛召至京師擢吏部右侍郎成化己丑遷左侍郎歷王李姚崔四尚書皆曰代此位者必公也壬辰漕河壅滯公往督官運事遂集癸巳勅拜尚書命侍經筵戊戌加太子少保賜玉帶麒麟服己亥加太子太保累進階至光祿大夫勳柱國甲辰加太子太傅公久掌衡鑑博采

公議不爲私撓天下翕然稱之有姦吏李孜省者貴幸用事憾公甚構成大獄再削職以尚書歸公不自辯列惟引咎自責而已今上御極攷省旣伏法乃吐實於官諸黨惡者罷黜殆盡而公壽考終命竟膺褒卹非獨復其故物而恩禮有加焉然則世之以仇怨相傾擠竭計盡勢而不爲後地者亦何益哉公素負學識善斷大事尤精鑒強記每經銓注雖稠人小吏閱數年猶識其名時料人壽夭成敗歷歷多奇中故其退也大夫士屢疏薦欲起之而公亦老矣惜哉公生永樂壬寅五月二十八日卒以弘治癸亥九月十



七日子龍已丑進士前翰林侍講先公十年卒孫繼祖以公恩廕中書舍人予與公居鄰每挹公風度聆其言論未嘗不歎服焉比聞公喪慨者舊之不可復見而繼祖以遺命具疏奉狀請予銘是惡可辭銘曰赫赫英祖簡修進良燕翼厥謀以詔憲皇翹翹尹公行譽言揚給舍獻替銀臺出納聲名焱馳意氣山拔亨衢在前靡適非達天曹峩峩公實任之端居廟堂進退百司絜短校長左右具宜翁受敷施惟帝所用手操權衡與世輕重北馬羣顧南金品貢二十四年既久且專手所植樹其高蔽天棟梁桷椽百材萃焉

盛名難居造物所忌城門魚殃崐岡玉碎少行老歸綽有餘地人才實難矧惟老成曰篤不忘天王聖明爵以酬勞謚亦稱情天之定矣人之勝矣君子有性不謂命矣九原有知公可瞑矣

河南按察司副使致仕陳君直夫墓誌銘

吾友陳君直夫舉進士拜南京貴州道監察御史三年丁外艱服闋改陝西道又三年丁內艱再改河南道皆在南京遷江西按察司僉事二年致仕歸十餘年南京兵部尚書張公悅薦其志行可大用乃起爲福建僉事督理屯田又二年復乞致仕時倪文毅公



爲吏部尚書特擢爲河南副使都御史林君俊舉以  
自代不果入再乞致仕巡撫都御史孫君需請畱之  
巡按諸御史交薦之又二年竟致仕去君子觀其進  
退之際可以知其人矣直夫鯁介寡合雖生長都會  
而有山林性氣不能與物湛浮遇節義廉潔士傾心  
嚮慕稍不合輒蹙頰而起若將浼乎其身家素饗奉  
親志養常俸外一無所取居喪非義賻輒辭弗受屏  
居舊鄉去府治遠足不至公室人以請託至必峻却  
之久亦無復至者惟事兩兄嫁其女撫妻之孤弟建  
祠堂以合族他無所好非所當赴雖故舊強之不屈

也其蒞官政務公與慎在南臺力操風紀嘗上疏請  
止中官取花木採言事之不得其職者在江西持法  
甚謹在福建清屯田在河南賑饑民皆悉心綜治不  
苟應故事顧其所拂意者恒多雖黽勉就職而志常  
在退其去也蓋有遺用焉若其經業精貫博涉史籍  
使得當督學之任必大有興作世之用違其才每如  
此是豈獨爲直夫歎哉然直夫之所自處則可謂不  
失也已直夫諱壯自號古迂浙之山陰人生正統丁  
巳其舉進士以天順甲申卒以弘治甲子十一月十  
三日乙丑某月某日葬黃龍尖山之原予與直夫同



京產又同甲第雅相知厚予久叨仕籍直夫每致書札無一褒譽語至相稱謂雖老必以字未嘗效時俗舉爵號故予銘直夫亦以字庶其有知尚能諒予且以爲其子終治命云銘曰抗世孤立不西以東執德之恒以與始終衆閔而蹶我若弗聰行我者天藏我在躬縱不大施弗喪厥衷吁嗟直夫其古人之風乎

明故贈文林郎翰林院修撰顧公墓誌銘

比歲崑山大夫士有斯文會諸耆宿有延齡會皆以桂軒顧公爲長縣官舉鄉飲亦爲賓會詔賜高年冠服巡撫都御史爲之致命於家暨其子鼎臣狀元及

第授翰林院修撰報未幾而公卒復會詔賜京朝官誥勅時鼎臣方以憂去上特予之於是公獲贈如其官階文林郎而不及見矣公之孫監察御史潛亦嘗爲翰林庶吉士故鼎臣暨潛奉左庶子毛憲清狀請予銘墓毛蓋其鄉人故知之特詳云公諱恂字維誠桂軒其所自號也生而秀整敦確學舉子業有成禮部主事吳相虞慎許可見公於塾器愛之請於耕樂翁內爲婚時吳方游宦南北有母老無他子弟家政悉以屬公公年未二十卽力爲營治不避勞勩內無私蓄業寢裕然未始廢學雖居屢闔書卷不去手母



懷麓堂集  
沒痛不獲養哀毀特甚感時觸事輒聲爲謳吟久漸成帙葉文莊公爲感而題之禮部既卒公始出居於外時父耕樂已老奉養備至喪葬無違禮仲見及寡姊皆高年家居亦禮事焉族黨有貧者時致粟帛見里中後進必勉使爲善多所成就有弗孫者恬然應之弗校也教子孫必以詩書禮義仕者爲忠居者爲孝親賢遠姦敬老慈幼言壘壘不厭故潛積學礪行督京畿學政人服其公馮臣雖未試而器識材局論者以爲不負其選皆公訓也公爲詩興致和適所著有鰲峰稿五卷啖蔗餘甘西湖紀遊各一卷藏於家

公生永樂戊戌六月二十五日卒於弘治乙丑五月二十六日壽八十八是歲某月某日葬於縣西鹿城之原銘曰盛德之世民多老壽協氣攸萃事亦非偶公年實高踰八望九踰九者誰公有嚴父惟兄及弟叢生並茂如彼松栢其凋獨後匪惟考終惟德攸好惟子幹父惟孫念祖公澤不匱名不可朽

贈中憲大夫太常寺少卿兼翰林院侍讀靳君  
遷葬墓誌銘

贈太常少卿兼翰林侍讀丹徒靳君以成化壬寅五月五日卒葬於焦石山之麓越二十有四年當弘治



乙丑十有一月朔日厥配封太恭人范氏卒於京師  
其子貴以喪告上特遣官諭祭命有司治葬事貴懼  
舊壙弗稱改卜於果山之原以丙寅某月某日遷父  
柩奉母而祔且念潛德久弗白徵同官費子充狀請  
予銘予稔知貴且見其居喪禮而哀銘惡忍辭哉公  
諱瑜字廷璧正統丙寅以鎮江府學生應貢入南京  
國監授温州府經歷溫兵民錯處吏率不盡法君確  
守峻制不枿牙角知府周琰器之曰此非一幕才也  
凡督捕機宜若征輸水利先屬他官者悉改屬之應  
手而辦有千戶訟民家已聘女爲妾以賂請君暴賂

於衆女卒歸所聘府倉例有賂君獨不受餌姦無所  
於宿君貌不甚揚人易之至是聲傾一郡周益禮重  
稱爲先生而不名每出輒令攝篆君積粟備賑舉墜  
補敝初若非攝事者瑞安平陽二縣界有海塘田苦  
風潮君築治完固民利之名之曰靳公塘民有恃險  
拒捕者官將處以大逆君憫其愚親莅所在警曉之  
其人感悟歸罪家得不坐海盜忽熾君以計擒其魁  
餘黨遂散通判闕君適入覲溫人投牒吏部請君或  
諷令少事關節君正色拒之事竟寢解官移家居十  
有餘年溫人道鎮江者必問安否大夫士還往慶弔



懷麓堂集  
若親戚然至於今不衰且其爲人孝友好施予尊賢禮士教子尤篤按察僉事丁玉夫遣貴受學丁後果有重名蓋其厚積薄發才弗用於乃以成其子之賢而顯其家固在哉太恭人同里名家女也慈惠朴厚事姑謹甚久弗育爲君置媵君義弗內竟遣之未幾得貴貴既進士及第迎養於官非公事未嘗一日不在側如是者終其身太恭人性亦好義所施棺具無慮數十計偶弗適聞貴有所調卹輒爲之加一餐云貴以學行累被簡擢直講儲宮以登極恩進今官以兩宮尊號恩進今對比又有日講之命太恭人

皆及見之壽至八十有八得正而斃禮合而葬其於君蓋有光焉銘曰事有幸會寧幕無倖彼賄進者自貽伊愧意或值悖無進寧退彼戀位者亢不知悔彼得其外我得其內矧惟我餘天有錫類我所生者於我終代旣盈我虧亦發我賻持此絜彼獲詎非倍由初質今若取諸貸若田旣秋功在一溉謂天弗明安所置喙惟魄有藏於彼江介遷斯耐斯曰有令配載徵厥祥來者未艾

贈通議大夫通政使韓公墓誌銘

贈通議大夫通政使韓公諱傑字仲彥及封太淑人



蘭氏通政使昂之父若母也公以昂貴初用皇太后  
徽號恩贈禮科給事中再用考績例贈通政右叅議  
移封例贈右通政比新天子登極加命令秩則兩宮  
尊號恩也太淑人始封太孺人累封太宜人太恭人  
以至今號命下乃卒且合葬於是朝廷遣官諭祭令  
有司治葬事仍給驛歸其喪而公與有榮焉公祖諱  
槃起家鴻臚寺序班終吉州吏目父諱尚敬贈如公  
官公生而天質秀穎少失怙居鄉無師傅自識文字  
通大義律已應務默合理道孝睦勤儉非義不苟取  
顧喜賙施貸不能償償不及數者輒爲棄責鄉之人

德之曰公有陰德他日必大貴富然竟不沾一命暨  
其子之成而不及見矣太淑人蚤閑內則吏目之在  
吉也公實從行聞其賢以祖命聘之公雖宦族而世  
襲清苦與寒士無異太淑人躬井臼爲養祖姑以下  
皆安之吏目卒歸橐蕭然姑久卧床褥太淑人侍湯  
藥夜未始帖席悒悒如不欲生姑念之曰真孝婦也  
比卒舅及祖姑皆繼卒太淑人連舉三喪情禮兼備  
人稱之如其姑之稱公旣卒太淑人日事紡績衣食  
其家不以煩其子故昂得專問學以底大成聲績累  
著致於九列太淑人就祿養被命服怡然終其身古



稱婦德不外見太淑人以壽且顯大夫士還往相傳  
播至形誦詠故其事加詳云通政君嘗督河安平得  
太淑人壽詩成卷適予以祀事東返請爲序比被召  
領易州薪炭場務以喪告於朝復請予銘禮恭而意  
傷辭弗獲乃按禮部侍郎王公德輝狀爲銘銘曰慶  
山之陽有田孔良旣畎旣疆有菑弗荒有婦儲我力  
復協我有子我播亦復獲我古有耕道亦有種德以  
小喻大不遠維則生雖弗榮沒則已哀老弗及偕卒  
同厥歸始則回勤終則共逸爲勤孰名逸則永畢有  
封若堂若所胥宇九原不亡可質斯語

明故封中憲大夫太常寺少卿前陝西按察司  
副使劉公墓誌銘

封中憲大夫太常寺少卿劉公約之文恭公之子也  
舉進士歷大理右寺副累遷右寺丞出補延平府同  
知進漳州知府擢陝西按察司副使歸及其子榮爲  
尚寶司卿陞階從肆品以考績例得誥進公今階今  
天子登極公以致仕恩當復進階而祭以東宮正字  
恩進今官以兩宮尊號恩當復給誥則又以移封例  
回所得誥封公爲今官命已至而公卒朝廷遣官諭  
祭如例而特勅有司治葬事蓋公以世業繼顯科爲



要官中道蹉跌久弗大振而晚歲遭際皆奇特出常格如此云公諱瀚約之其字別號樗菴少爲蘇州府學生景泰庚午領南畿鄉貢卒國子業有名其舉進士在天順丁丑試政禮部頒詔至楊州府府餽金二錠公峻拒弗納列郡皆相戒勿餽縉紳繪郡金圖賦詩頌之其爲大理在天順成化間讞駁詳慎嘗奉勅錄京畿及江西重獄平反四百餘人出賑河間諸府饑民籍名給粟者十五萬其爲同知八年專理戎籍多所釐正鄰郡懇訟者踵相沓爲知府得專制鉏強抑暴民甚安之部使旌於朝章至八九上爲副使益

持憲體會邊徼多事督餉不乏資望日積而遽致事以去西安府餽金爲贖却之曰不聞致仕與在任同耶時弘治己酉也居鄉十七年足不至公室歲鄉飲有司禮爲大賓其平生服履孝義與人交際無諛詞妄語精法比達政體善古文歌詩而終身不自伐續未屬呼諸子孫至前連舉孝弟忠信四字訓之猶懇懇不置其卒以乙丑十二月二十二日壽八十有一矣配吳氏有內行先公二十餘年卒累贈恭人子男十一祭其長也爲中書舍人直內閣預經筵國史事以慎敏稱每欲歸省不可得比卒乃請予銘禮也吏



部侍郎王公濟之方修郡志列公名宦當藉是以傳  
銘惡足恃哉銘曰儒臣之子爲刑法家內守外臺厥  
績孔嘉理同事殊父有遺教其所爲教維甲科是紹  
亦有遺恩匪我自取所弗自取維以貽我後維詞及  
翰亦詎非儒還以錫予其祖風之餘乎

明故資德大夫正治上卿都察院左都御史贈

太子太保謚恭簡戴公墓誌銘

都察院左都御史戴公旣寢疾遺囑其從子兵馬副  
指揮星曰不得以卹典累朝廷已而禮部稽據典制  
以聞上再賜諭祭令有司治葬事而給驛遣官護歸

其喪監察御史楊儀等數十人以公督學所造士合  
詞上請特贈太子太保謚恭簡蓋於禮加隆焉公諱  
珊字廷珍其先宋錢塘令士先自婺源徙浮梁祖諱  
嗣安以子昇貴贈陝西布政司右叅議考諱昇嘉興  
府學教授皆以公貴累贈南京刑部尚書公以縣學  
生舉天順壬午鄉貢甲申登進士第成化丙戌試四  
川道監察御史服闋乃授職壬辰督學南畿凡考校  
必以文藝占器識有請謁者孫不色拒而終一無所  
撓羣士帖服至無後言戊戌遷陝西按察司副使仍  
專學政政如南畿地加廣雖遐陬僻壤未嘗不到修



懷慶堂集  
古聖賢祠廟或增秩祀典聞民間孝節事亦奏旌其  
門甲辰擢浙江按察使令尚清肅丁未遷福建右布  
政使弘治戊申轉左布政使勤教養通財賦情法兩  
當論治體者必歸之己酉擢都察院右副都御史撫  
治鄖陽諸府豪右多窟流聚爲利公刻日令首罪民  
所闢田多匿稅畧償所費而設其餘嚴練兵伍自製  
爲營陣法蜀盜野王剛越境入竹山平利諸縣守臣  
畏罪莫敢發公請合湖陝兵誅其首惡縱其脅從千  
餘人事遂定時偉其功公不自伐也辛亥召入爲刑  
部右侍郎乙卯轉左侍郎嘗會勘荆府不法事皆得

實時羣疑交訐朝廷是公議卒行重典丙辰拜南京  
刑部尚書讞獄尤謹庚申復召爲左都御史公益自  
檢律務持風紀雖書簿之細必極精覈嘗與吏部考  
察京朝官者一考天下述職者再孝宗皇帝親鞫大  
獄諸司震悚公從容應對時有所開析天威頓霽上  
知公清慎每廷宣面問至移晷刻引疾求退必優詔  
勉畱命醫賜食間有慰諭若家人父子然者公不覺  
感泣上亦爲之動容章前後六上留益力公遣其妻  
若子先歸以身待命乙丑新天子嗣位公不敢輒言  
去力疾視事疾再作竟不起卒之日爲十二月二十



三日距其生正統丁巳二月七日壽六十九娶夏侯氏累贈夫人繼吳氏累封夫人子晴國子生公廕也正德丙寅吳夫人挾晴來扶柩歸以是年某月某日葬於某山之原公德性和粹中耿耿不苟合而洞達無城府奉職守法不爲物撓而意常近厚祿仕四十餘年家無餘貲壹意官守雖尊官高年猶手削章牘辰入酉出窮寒暑不變厥歷中外所至有聲績學政尤著身旣沒人至今道之不衰所著有松厓稿數卷公在同榜中夙見知厚常謂予曰子必銘我其治命亦屬太子太保閔公以及於予嗚呼是安可負哉乃

哭而銘之銘曰昔我孝宗咨訪耆碩公長中臺時聞造膝公秘不洩曰我后之德公簡帝心帝監公直公所執法躬就繩墨其有弗率則惟我職無曰棘棘或爾默默我法弗忒曰我無遺責世有碎玉亦鮮完璧惟公始終有美無擇惟帝嗣位惟父臣是式臺評廟議亦懋爾績古亦有言天壽平格有平若公壽弗臻極惟所遭值及所樹植令名在茲永耀金石

明故福建按察司僉事致仕進階朝列大夫蕭公墓誌銘

海鈞蕭公旣寢疾附戶部郎中王君蓋告訣於予未



懷齋堂集  
幾其子鳴鳳哀䟽至則奉治命請予銘予爲之泫然  
以悲蓋自壬子之秋別於城南僧舍十五年於今矣  
嗚呼予乃竟爲公銘耶公諱顯字文明號履菴更號  
海釣以山海衛學生舉天順己卯京闈第二成化壬  
辰乃得進士第甲午擢兵科給事中有武臣中官怙  
勢求賞者公批奏尼駁其功坐是賈怨弗卹也涿州  
有巫矯邪神自東方來京城男女爭負土爲築祠宇  
公抗章劾之并禁私剏菴觀等數事言極剴切畱不  
報外間傳言禍且不測忽召至左順門令中官諭遣  
之人始知其事後數日詢之則巫已逐矣然權幸人

嫉之不置辛丑遷鎮寧州同知時方作草書手閱朝  
報付其子趣治裝仍終數紙乃罷鎮寧非人所居其  
俗每獻饋流官納則喜拒則疑公孫謝理論皆敬服  
無敢怨者越八年爲弘治戊申稍遷同知衢州府勾  
稽戎藉所得隱丁甚衆越三年辛亥擢福建按察司  
僉事承勅領屯田事勸督交至民相率輸納歲無畱  
逋又一年以萬壽聖節入賀刑部尚書白公昂欲有  
所薦擬親戚有力者亦樂爲之授公不復顧戀上䟽  
徑歸歸數日而命下乃治別墅與騷人使客游衍其  
間有乞書千文者秉燭終卷遂得目青而賦詠不輟



乙丑今天子卽阼以恩進朝列大夫正德丙寅十一月二十六日乃卒續未屬猶憂及時事且口占對句課其孫其至死不亂如此距生宣德辛亥十二月十一日壽七十六公德性醇篤不妄言笑早失怙恃終身孝慕事伯兄文清甚謹撫其孤引鳳爲之婚娶比死又厚葬之交友尚意氣久而不變當官盡職視患難若所當得至於幾先勇退順事正命尤士君子所難雖所蘊蓄未盡見於世顧以劉文安公爲主司而得易魁以三原王公爲吏部而得薦爲方面則其人可知已山海本用武地舉科第工詞翰皆自公始公

詩清簡有思致所著海釣集鎮寧行稿歸田稿若干卷其爲書尤沉著頓挫自成一家卷軸徧天下傳至外國後來者殆鮮及云配喬氏繼馮氏子五孫三羣從孫爲諸生者尚數人喬孺人之葬予嘗爲銘今公與兩孺人合葬於某山之原則丁卯閏正月十六日也銘曰孰得之難弗患失邪孰進之難退乃亟邪將理有先難後則獲邪抑數有終信而始則誣邪不然何壽其身而復世其澤邪觀德者盍以世而不以日邪

明故朝列大夫南京國子監祭酒羅公墓誌銘



天順甲申廷試進士憲宗皇帝在諒闇制辭從簡以治國平天下之道爲問泰和羅公璟對以爲孝乃萬化之原願舉此推之以成聖治上深納之賜及第第三人與吉水彭公教太倉陸公鉞皆天下選也彭陸皆不壽以沒公獨考終於家而今亦不可作矣惜哉公字明仲其先有伯壽者爲元盧溝簿被旌爲孝子曾祖子理國初爲德安同知繼娶陳夫人卽少師楊文貞公嫁母也孳家戊西安文貞言於上爲蠲其籍得公祖賓廉以歸公父進善從文貞居夢鶴而生公額有赤誌可寸許文貞曰此鶴相也當貴且多壽公

未弱冠文貞已卒讀其家所藏書文思溢發巡撫侍郎楊公寧奇之遣入縣學初仕爲翰林編修修英宗實錄成化丁亥書成遷修撰嘗上疏言六事上優詔答之慈懿皇太后之喪屬有異議公上疏言宜合葬裕陵又與諸學士合章以請乃得俞命壬辰同考禮部奉命校通鑑綱目癸巳修續綱目甲午充經筵官丁酉書成擢司經洗馬戊戌孝宗進學東宮簡侍講讀庚子主考南京凡所校閱暨精當而是科得人尤多癸卯以母喪去丙午闋服上京師忽調南京禮部員外郎中外駭愕莫知其故後李孜省獄詞上乃知



懷麓堂集  
爲所中或云鄉人有弗合者構成其事而公不自辯也弘治初三原王公爲吏部薦爲福建按察副使專督學政政尚寬簡程試外恒以義理爲教士類悅服癸丑召爲南京國子祭酒方將大有施設時已沾疾猶力起治事丙辰考績京師至河西疾作乃具疏乞致仕遂得請癸亥七月二十六日卒距其生宣德壬子某月某日壽七十二禮部爲請於朝上眷公舊學特賜諭祭命有司治葬事云公端雅諒直志識不羣博學高論動以古人爲準平居不事詭激而崇獎節義汲汲若不暇視天下事皆所欲爲中值困阨累歲

再陟稍克振拔而公亦病矣爲文務簡勁詩亦脫綺靡有冰玉稿若干卷蓋其所自號因取以名其所編錄若五經旁註周易程朱異同刻於福州予與公同榜又同在史局爲道義交恒念公之退不能薦死不  
能弔以爲公負公卒之五年子燧以治命奉狀來乞  
銘乃爲銘以補葬禮之闕公墓在白泉山之原其葬  
以甲子十二月二十九日至是五年矣銘曰濟辯以  
博孰我鋒遏守正以約亦孰我志奪惟其人之卓乃  
命之闕九原是託惟斯丘之樂孰斯人之能作







具公辯其誣人惑之後果得真盜乃大服初命爲主  
事等以父喪闋服改工部督造供應器物綜理甚精  
改吏部驗封遷稽勳員外郎母喪服闋再入驗封進  
郎中奏擬精核人無訾議成化丁未擢通政司右通  
政專領武官誥籍弘治庚戌遷太僕寺卿馬政修舉  
壬子擢工部右侍郎督易州山廠薪炭事朝治經畫  
事集而人不擾乙卯召還轉左侍郎修倉庾葺宮掖  
充唐府冊封使庚申拜尚書修諸禁門社稷壇及京  
城垣陴凡涉公帑民力者時執藝以諫上嘗召至便  
殿趣造戰車公言派辦不可亟請以舊所積榆槐木

爲之又嘗問工匠缺乏公歷陳災傷逃徙之故皆見  
嘉納正德丙寅修盧溝橋隄製內殿龍毯特賜玉帶  
百餘若白金綵幣等物不可殫紀前後所得勅誥贈  
封其二代及妻者凡四命廕其子二人旣病亟具疏  
乞休上念公勤慎勉從所請進階榮祿大夫令有司  
月給米三石歲給輿隸四人命下而公已卒矣訃聞  
上悼惜贈太子太保遣中官賜寶鏹萬貫爲賻遣禮  
部官賜祭者再仍令有司治葬事如制云公溫純樂  
易不事矯飾雖風雨寒暑不廢朝謁官事未畢繼之  
以夜性敦孝友兄弟同居白首無間言族里窮急力



爲賜施而自奉簡約不爲祿位所移易部吏少俊者  
教以舉業且爲給膏火費後舉鄉貢者二舉進士者  
一皆德之終身下至僕隸亦感慕無飲怨者是亦可  
謂難已公生宣德甲寅六月二十三日卒於正德丁  
卯閏正月八日得壽七十四以三月二十四日葬於  
都城南五基之原其配陳夫人合焉公初娶於陳生  
子洪側室滕氏生子云今爲國子生公遺事尚多尚  
書李公時器有狀銘不能悉也銘曰卿有六署公居  
其三幼學壯行老且益諳工曹最繁公所終始世歷  
累朝歲幾四紀夙興夜寐心矢靡他日累月積歲計  
實多盡瘁而生得正而斃亦有餘恩爲身後地凡器  
之類銳必先折公戢其鋒有用無缺凡物之生蚤必  
先萎公歛其華有實之理公不言功皇則念之公不  
責效天則驗之孰傳厥宗家有介子孰最厥名國有  
太史

明故太子太保南京兵部尚書致仕贈少保王  
公墓誌銘

今年春上釐正舊典特嚴贈卹公安王公適以訃聞  
吏禮二部最公功行旣遣官諭祭命有司治葬事復  
特贈爲少保蓋公爲尚書以平蠻功加太子少保以



致政加太子太保至是凡三加而公不及見矣公自  
憲宗朝爲大理評事累遷右寺正奏讞精覈嘗奉勅  
錄四川囚活百餘人勘陝西藩府大獄不避權貴擢  
四川按察副使孝宗朝改陝西復爲四川按察使其  
分巡川東發廩賑饑又請官銀十萬兩爲糴費民賴  
以不死者甚衆有貴州苗弗靖已徵兵進勦公獨謂  
不煩師力卒從其議比長憲有滯囚累千人應手而  
決先後凡四入蜀民習政教去之日老稚遮道不忍  
釋孝宗朝遷南京都察院右僉都御史兼督巡江官  
校例出巡捕公奏令御史偕行以防掎克總督京儲

出納明允會貴州巡撫官闕朝廷特勅公往黜藩臬  
不職者數人土官子皆令就學以消獷習入長大理  
多所評駁嘗與兩法司擬定問刑條例行之復入南  
京爲戶部尚書其所綜制如督儲時加法爲詳其督  
師貴州也值米魯之亂勢甚熾特命公兼左副都御  
史統本鎮及楚蜀廣東西諸路官軍士兵十二萬分  
四道以進雲南兵亦來會扼其歸路賊先送所敵內  
臣於軍及戰北窮走首惡就斃擒斬賊徒五千二百  
級俘其屬千三百人還所掠男婦五百餘人破其寨  
箐千餘區燬其倉屋十倍其數獲其牲畜又三倍之



赦諸脇從且立故首之後以統其人上賜勅獎勞召還京師道引疾乞休弗許既陛見賜白金綵幣尋改南京兵部叅贊留務秩之始加也論者以爲未稱其功而公求去益切三歲間章十二上乃得請上賜勅給驛月給廩粟歲給輿隸卹典之備復有俟於後云公諱軾字用敬世爲荆望子五貢舉鄉貢士賞縣學生先卒贊亦舉於鄉資以文蔭補國子生貞以武功授總旗賜冠服公生正統己未九月二十日其卒以正德丙寅十一月十六日葬以丁卯某月某日其地曰某山之原公篤孝友撫孤姪有恩簡直無僞持論

常近厚自奉儉約不避勤勩所陳利弊無慮數十條多見采納歷官四十餘年人無訾議至交章騰薦其病在告又趣起治事所領兵刑錢穀皆劇務所至有聲績而貴州功尤偉予與公同出湖南又同舉進士故贊以治命奉兵科左給事中鄒君文盛狀來請銘銘曰有苗西南匹婦爲孽潛噓虐談如燎斯烈帝簡公才往授之鉞坐帷定計分兵擣穴如竹斯破應時解節苗民歡抃如水濯熱公來何遲公去何猝公歸獻馘帝甚嘉悅論功在廷公不自伐辭章疊上勇退幾决如藏太阿有用無缺功名始終指詎多屈史有



特筆必先大節我銘公行以厲來哲

明故封徵仕郎禮科給事中李君墓誌銘

泉之晉江有李封君者諱杲字世白兵科左給事中  
貫之父也以子初命值聖天子御極上兩宮尊號恩  
封徵仕郎禮科給事中錫以勅命鄉之人榮所被命  
兼賢則君之之義皆稱之爲封君封君云君初學春  
秋不樂爲科舉業然專用教子講解程課倍於外傳  
貫旣舉鄉貢無他兄弟不忍出求仕君携上京師試  
禮部弗利而歸教益至越數年貫始得進士入翰林  
爲庶吉士每念君不置將引疾歸省君聞之曰柰何

以我故廢業復間關北來畱官邸諭以守身蒞政之  
法閱數月乃去去則屢致書中告戒疊疊不厭其誨  
迪周悉蓋如此故能成子之名馳其身大顯其家君  
子曰固宜君敦本篤行蚤失怙恃鞠於繼母陳氏事  
之四十餘年曲盡孝養陳至今康樂無恙事前母兄  
景如其父君平生好義舉縣有六斗門潴水溉民田  
可千頃一日盡決縣簿董修治後漁其利功弗時就  
君衆讓之爲所窘民閔甚將甘心焉君曰吾固民也  
其無所與校乃止君輕利好施值歉歲則蠲佃租之  
半傭人老羸者均其直鄰黨有貧者輒周之刻意古



學涉獵羣籍先達博雅益加推讓羣子弟皆取則焉  
君生景泰某年正德某年卒年僅五十七惟貫一子  
有行與藝偉然遠器也女四人適某某皆縣學生工  
科都給事中許啟衷閩人也嘗奉使道晉江獲見君  
豐容雅度言溫而氣充殊禮重之比還朝貫亦以使  
歸則聞君已捐館因狀其行貫奉以請銘狀稱君所  
居有松數十株惟意所好因自號愛松故子誌以爵  
舉而銘以號著終君志也銘曰居視所與物亦有焉  
彼愛者松惟物之賢中貞外堅不與世妍排風傲霜  
以歲以年善者好之如此松然發為枝柯其高蔽天

後寒而凋名則固存封以識之永矢弗諼

封大孺人趙母胡氏墓誌銘

編修趙生永旣喪其父文林翁獨奉母胡太孺人以  
居越三年永舉鄉貢九年舉進士被簡為翰林庶吉  
士又二年授今官未考績聖天子嗣位恭上兩宮尊  
號以恩被勅命於是贈翁如其官而封母今號又二  
年當正德丁卯太孺人年七十一以壽終永衰經來  
請曰先生旣銘吾父寧獨為吾母靳予愴然感之乃  
據其所自著狀為銘胡之先出湖廣沔陽太孺人生  
而簡重和惠聞講說前代故事涉女德者輒能領解



嘗有相工至其母欲見之謝曰吾聞女子行必擁面  
柰何輕以示人相工曰無俟面矣年二十一禮歸趙  
氏文林翁諱貴爲繼室姑年幾九十太孺人佐夫致  
養倍於恒品食必手製湯藥必嘗而後進翁先娶吳  
氏遺四女太孺人視若己出鞠育周至比長擇宦族  
歸之翁久未有嗣太孺人爲置二媵德常下逮己而  
自生子永其長也翁置塾延師羣鄉子弟與之共學  
每躬課所業欲給錢以勵勤者太孺人曰勸之以利  
非所以訓也請以紙筆充費翁曰吾慮不及遽從之  
永之學於予也太孺人實佐翁翁將易簀指永示之

曰此汝責也及卒太孺人哀毀踰制雖一茶必以薦  
念與翁勤家久始致豐裕至是獨綜內政凜如嚴君  
戒永曰汝之業汝父之遺望也我幸不死獲見汝之  
立庶幾報汝父於地下自是每語及輒泣下沾襟永  
用是厲學砥行揚親亢宗增飾堂構光於往世母之  
教固不可誣哉銘曰爲夫代終而保厥豐教子旣庸  
而饗其封生無憾容沒有遺寵九原其逢寧不曰孺  
人之功乎

明故封翰林院編修徐君墓誌銘

有談吉水徐封君之賢者禮部侍郎費君子充曰君



諱晉字廷亮以字行夙敦孝義羣從昆弟類以豐裕相勝君父處士公獨守故業無所增拓顧樂爲施子母高孺人尤慈煦見饑寒困迫如切其身族子失怙恃育而室之凶歲或鬻粥以飼餓者君每承命必竭力行之逋不能償者焚其券人或以爲難則應之曰麥舟不俟命而發矧旣命乎君子曰善養志者剛直負氣見媿嬰澳恣之人殆欲唾之當廣坐中非非是是無少假借用是爲人所憚或以買怨無他兄弟中外侵暴屢遭頓抑竟不爲所屈或被卵翼後黨附仇視者待之如初及諸子成立家寔盛皆革面求納又

待如初其人卒自慚悔若無所容蓋其內有涵蓄不過爲伎刻又如此晚益韜戢世故不一挂齒頰因自號曰閭菴著志也平居足不至公府鄉飲禮請僅一赴後不復往媼戚請託語涉官府輒顰蹙搖手謝之一布袍十稔不易旣以子穆貴被錫命非令節嘉禮不服綺繡勤勵自策夜臥蚤作卒以爲常少習經業喜接章逢士下逮庸人孺子見之無不意滿若是者屢屢言之益以穆爲子禮部所舉士雅相知厚故耳孰焉君生某年月至某年月壽七十乃卒葬於某山之原其封曰翰林院編修階文林郎故人稱之曰封



君乃按狀以銘銘曰庶以親著卿以子名前千百年  
曰此徐氏之英也封君有子太史有父身所爲教以  
貽於後後千百年其亦曰無忝於徐氏之冑乎

封翰林院編修可閒顧翁墓誌銘

予嘗序可閒顧翁事又表厥考遺善處士之墓比翁  
卒厥子清來請銘翁之輿况旣序之詳矣茲撮其行  
實爲銘復序以系之按顧氏本江南著姓蓋自晉已  
然居華亭者若干世翁曾祖秀一以行稱祖文理考  
顯皆力本修行而父德尤著所謂遺善處士者實生  
翁翁亦不仕治家政及子貴曰吾可以閒矣始有是

號後以子官受封人猶以號稱旣老乃復翁之翁號  
髯魁幹顧步有威意度闊略而中屹屹負志操處士  
舊業爲外兄沈氏所侵弗與校翁曰是先世所遺者  
其惟我責乃白於官盡反其所侵議者謂處士能讓  
而翁善守兩賢之家有遠役沈度其憚行要重賂爲  
代翁奮自往卒事還費省十三四自是鄉鄰無敢侮  
者相戒曰顧氏有子矣樂赴人之急勇不避難解紛  
釋憾拜於門者踵相接與人言不逆詐雖至親過必  
面折然不畱於心明日有善又稱之故人畏而不怨  
治生無詭遇粥貨有弗善直以告人雖弗售弗計貨



不能償者或因以乞之蓋其勤勵儉節寢致優裕實未嘗腴剝爲利故凡有興作衆懽趨之回視他姓固有強而弗赴者因益以驗翁之賢翁雖無官守恒憂人之憂比值歲旱與鄉大夫禱雨徒步走烈日中遂得疾疾且革謂諸子姓曰吾今年七十三與吾父同壽死不恨獨不及清歸歸則以吾言諭之以終吾教云蓋清之就外傳也每夜歸翁必課所業清舉解元進士爲翰林編修翁來視於官及歸始被封清遷侍讀以母喪歸翁乃訓以官事其所謂終教者以此清再入朝在講筵史局方以學行嚮用而翁弗待矣翁

以正統某年月日生正德某年月日卒是年九月十三日葬墓在縣之修竹鄉吉麗橋處士墓以厥配陸孺人先翁卒且葬虛其半曠至是乃合亦治命也翁生清及某某孫某某按狀汪編修抑之所撰次而清所自創孺人亦著姓昔所謂顧陸者與翁媿德其葬別有銘茲不悉序也銘曰立爾卓不摧以弱守爾樸不缺以薄不刻不斷寧我爲璞亦寧我爲木不棟以桷我稼我穫其苗孔碩有德與齒矧有封爵我憂其劬亦饗其樂我所自取若手諸橐惟厥子攸託述其匪作



戶部郎中徐良佐墓誌銘

今年春良佐手二軸請予書洞庭岳麓詩辭曰廷用  
出先生門十五年矣而寸紙隻字未嘗有獲知久厭  
詞翰諒不爲知者斬予方辭謝良佐意懇甚趣僮僕  
具筆墨必得乃已予自禮闈得良佐後每聞能官聲  
不意其酷嗜此殊以爲訝越兩月良佐忽遘疾亟  
屬其友易吉士舒誥欲得予銘數日遽卒不益可訝  
也夫嗚呼不亦可痛也夫良佐姓徐氏諱廷用良佐  
字也世居吾長沙之醴陵祖某有隱德考某某縣丞  
縣丞君仕不顯嘗指良佐曰是必亢吾宗比弱冠遣

爲縣學生稍長學驟進同輩者多屈爲弟子成化丙  
午舉鄉貢其舉進士當弘治癸丑越二年乙卯授戶  
部江西司主事督都城商稅通州倉儲及內監諸場  
芻秣事皆劇務長佐夙夜勤勩力拒請託貴戚僕隸  
有牟利撓法者輒舉按之庚申丁外艱闋服癸亥改  
陝西司甲子都御史閻公仲宇承勅治宣府大同邊  
儲謂非才識練習者莫佐其事訪於衆得良佐名特  
奏請以從時芻糧闕乏悉力區畫令不煩而事集歸  
遷廣東司員外郎正德丙寅進河南司郎中凡歷四  
司皆繁甚比爲正郎躬領庶務益殫志慮而官長信



任僚佐敬服無少訾議識者皆以遠大期之然愈自刻厲敦尚儉素食飲衣馬不加於舊既在告猶手削奏牘矻矻不少置獨念母老欲圖終養竟不獲自遂以沒年四十有二而已銘曰固則執之約鮮失之止或尼之吁天誰詰之年之嗇矣塗之阨矣維子之克矣家之澤矣衡山之巍兮楚水之瀾兮生斯葬斯兮嗟兮其全歸兮

封太宜人何母李氏墓誌銘

封太宜人李氏於故刑部郎中何君商臣爲元配於今兵部郎中孟春爲母以君主事初命封安人孟春

初命雖不過主事而例從夫貴又以獨存例封今號及見其子爲今官以卒卒五十有八初太宜人歸於何氏年甫十有九事祖姑鄧安人姑廖宜人備極孝養喪葬皆如禮成化辛丑君舉進士太宜人携二子從至京師弘治辛亥君錄囚南畿厥考廷彥公致雲南按察司僉事君遣婦子歸養於家太宜人事其繼姑李宜人如其先姑癸丑孟春舉進士旋遭君喪乙卯以母命娶於歐氏丙辰擢居兵部之職方太宜人就養於官越三年得疾癸亥按察公喪孟春以嫡孫承重正德丙寅復任丁卯李宜人喪再承重歸太宜



人手足半痿又弗良於言孟春意揣色候饑飽寒煖隨事致請太宜人必領焉蓋非公事不敢離左右嘗考牧三邊數閱月既見則喜見於面雖在哀疚恒侍以自適已巳湖南多盜鄉民多走徙孟春奉太宜人野避者一入城者五重貽親憂復奉以北上北補武選未一月舍館甫定而太宜人疾革時其少子孟旦及崔氏女皆先天惟孟春在側云李與何皆郴州望族太宜人黔江教諭通之女生景泰壬申六月六日卒於已巳九月十有四日君葬於劉仙嶺太宜人今葬於何山十里而近從吉卜也女之職大抵婦勞而

母逸太宜人少勤饋饗暨膺祿養又困於牀禱出則涉舟車之險殆不能一日安乎其身孟春少劬問學不任家務既失怙又值母病形影相依倚聲氣相煦嫗慈孝之懿有人所甚難者比其再至文益奇才氣益充拓方將自見於用而又抱憂戚以去君子蓋深哀之子雅有一日之長尤知且厚乃爲其母銘與其父之銘益傳焉銘曰郴去京畿萬里一從夫三從子官爲家古有是全而歸更何俟惟母德在堂所葬有銘亦近禮我爲文銘再世以其餘昭內懿生同居死異地魂必之藏在此



大理左寺正趙生訓夫墓誌銘

趙生訓夫既寢疾予往視之生感然曰式病劇且歸歸幸獲終養惟違遠門下甚恨予憮然感之越數日果上疏乞致仕比命下以手書告訣其父且遺囑請予銘初生介柳中書文範見予未遇時後直內閣為官屬因學詩文於予久且習與吾子兆先交最稔悼其死手錄其遺稿以傳茲惡得無情哉生諱式訓夫字也生少聰穎異凡兒學舉子業尤工楷書從徵仕君宦淮閩間弱冠將入郡學以父命綜家務始棄舊習徵仕既歸休日服孝養徵仕謂之曰國家求賢路

廣汝無擇仕且無以我故自畫生上京師以儒士隸禮部印局需次未至弘治庚戌尚書耿文恪公廩於官甲寅少師徐文靖公始薦領書翰事試中書舍人三年乃得真授凡朝廷冊寶制誥詔勅經筵講章榜文試錄多其手出預修大明會典加正七品祿修玉牒賜銀幣修歷代通鑑纂要亦有賜歲時所賜酒饌扇袋諸物及御製詩皆郎署所不預嘗頒孝宗覃恩詔及孝肅太皇太后哀詔於兩畿諸郡閣直出使前此所未有九載秩滿遷大理左寺正加從五品祿其視常格亦加一等云生明敏清辯博聞而達尚多事



遊宦歷覽山川形勝識民情事變使卒業科第決不  
至汨沒既以藝舉專事書牋益精鑒賞真行篆隸旁  
及繪畫芙蓉松菊竹兔之類種種清絕每應制揮寫  
刻時立辦遠近購請無虛旬日碑板摹刻後先輝映  
評騭品第有指不能多屈尤擅越調酒酣對客撫几  
歌吟綽有風致生沒後士大夫家殆爲絕響予於是  
蓋永歎焉生景泰某年某月日卒以正德某年葬  
於吹臺山竹臯之南病革時族戚爲治後事集諸鄉  
宦緘所藏書畫諸物待其子君澤來畀之君澤亦析  
其貲以遺幼弟皆可謂不負者銘曰有穎在囊不探

而脫見爾蒙拔試爾礪發持以嚮用孰爾鋒過匪武  
斯競乃文之蔚彼崛而突胡奄而忽維中書君未老  
而折才孰爾予命孰爾奪嗟哉趙生飲志而沒

明故推誠宣忠翊運武臣特進光祿大夫柱國  
慶雲侯贈宣國公謚恭和周公墓誌銘

孝肅貞順康懿光烈輔天成聖太皇太后既崩之五  
年爲正德戊辰其中弟太保長寧伯彧卒越明年己  
巳二月十日伯弟太傅慶雲侯壽亦卒上屢爲震悼  
輟視朝一日贈長寧爲侯謚榮僖贈慶雲爲宣國公  
謚恭和遞進一等遣禮部官諭祭命有司治葬事焉



公姓周氏壽其諱字永齡世居京之昌平曾祖諱德清祖諱福山皆贈某官考諱能贈某官謚榮靖妣甄氏贈寧國夫人生女二太皇太后其次也繼配高氏亦贈寧國夫人實生公公少奇俊不凡性度詳雅寡言笑讀書通大義天順癸未襲榮靖初命爲錦衣衛副千戶尋進左軍都督府都督僉事成化乙酉進都督同知丁亥賜誥券封慶雲伯辛丑進慶雲侯弘治戊申加太傅蓋自爵命以來日益貴盛其所被賜不可勝紀公禮賢下士雖接幼賤亦假以辭色終太皇之世不敢恃恩澤爲驕縱雖例不治事而嘗奉使藩

府印記戰馬皆以勤慎見稱朝請之暇必躬蒞家塾課諸子書史筆畫未嘗輕出門戶客至刺入非親舊不輕引接以爲常縉紳簪弁之徒或有不識其面者焉然則太皇蔭覆之仁累朝報本推恩之孝於公見之而膺奉持守不危不溢以衍於無窮者公之賢亦可謂無負耳矣公生正統壬戌六月八日壽六十八卒之年三月二十八日窆於昌平鸞臺山祖墓之次公以治命屬二子奉狀徵銘銘安可辭哉銘曰霽彼慶雲爲瑞於天地有封邑嘉名應焉鍾靈蘊和亦有人瑞寧國之子聖母之弟若雲從龍自下而升而朝



懷麓堂集  
布韋而暮簪纓五爵之二三公之一一門兩封此貴  
誰匹歷事三朝餘四十年我皇眷之惟親惟賢榮名  
寵光越有終始生斯葬斯於帝之里鸞臺之鄉裕陵  
是望山環水朝靈氣攸藏穹碑峩空上有文字公子  
公孫來者是視

懷麓堂文後稿卷二十九

誌銘

明故通議大夫吏部左侍郎兼翰林院學士掌  
詹事府事張公墓誌銘

嗟乎東白公已矣公姓張氏東白其所自號竟以號  
行天下皆知有張東白者而今已矣嗟乎公五歲精  
爽過人書過目成誦其父松亭翁名之曰文魁寧靖  
王召見令作儷對韻語大加賞歎書元徵二字賜之  
因易名元徵松亭携入閩觀者塞道公至考亭拜朱  
晦翁遺像輒有志所謂道學者松亭謂曰彼儒先曷



嘗不由科舉進邪乃入南昌縣學爲生都御史韓公  
雍奇之曰此人瑞也復易其名曰元禎字之曰廷祥  
天順己卯舉鄉貢庚辰試禮部得詩魁英宗每掄材  
必兼膺幹公貌癯然若不勝衣李文達公特簡爲翰  
林庶吉士劉文安公奉詔授業見其文矍然以驚壬  
午授編修考校精覈歲貢士鮮入格者癸未同考禮  
部得太倉陸武爲省元人始未信後果有大名憲宗  
卽阼上疏請行三年喪復言講學聽治用人厚俗四  
事預修實錄書法不苟時同官多不合者成化丁亥  
謝病歸示無復仕進意各益重從之遊者四遠而至

藩臬郡縣至者未始不往見見則憮然自失諸言事  
者累薦起之不果居二十年值孝宗卽位弘治戊申  
召修實錄至則以舊勞遷春坊左贊善上勸行王道  
疏幾萬言入侍經筵己酉考南畿鄉貢辛亥書成遷  
南京翰林侍講學士癸亥念母老復謝病歸越五年  
戊午召修大明會典爲副總裁至復遷翰林學士掌  
院爭孝宗隆其各特置日講兼侍東宮講讀數月以  
母憂去壬戌擢南京太常寺卿癸亥召修歷代通鑑  
纂要改太常卿仍兼學士侍日講甲子命掌詹事府  
事乙丑考會試卽奉詔授吉士業一日忽上疏請讀



太極圖西銘諸書上亟索內閣得之蓋有意大用未  
幾而龍馭上賓矣今天子繼統以侍從恩擢吏部左  
侍郎仍兼學士加從二品俸勅爲實錄副總裁自是  
數病病必連月屢上疏乞致仕優詔弗許正德丁卯  
滿三載未奏十二月晦日卒公少侍父疾籲天請代  
喪禮尚古事母色養惟赴召時不及躬歛憾之終身  
遇二弟有恩嘗建一莊歲置租二百石以濟族鄰以  
四百石貸鄉民有司爲給帖書籍其於書務博涉尤  
好探經傳蹟隱多所獨得一時談理學者數人各樹  
門戶而公岸然不爲下作易詩春秋語要四書集要

太極圖說要綱目近思錄家語解要皆未脫稿爲詩  
文始務奇崛勇脫蹊徑晚就平實若出二手然類爲  
人所重莫爲軒輊論議揭揭尤深嫉惡至不可近及  
再入宦途益寬厚雖後之寒士亦與抗禮顧或爲貶  
抑要其中容有所見賢者之不可測固如此天每艱  
於生才才者未必用有如公者豈易得哉豈易得哉  
公生於正統丁巳某月日年七十乃卒其子詣予請  
銘公亦豈易銘哉銘曰木生在山久乃益堅輦致於  
途蹶萬牛以顛貢之明堂將棟將梁忽內蠹以傷孰  
其生之而卒棄厥良人材實殊公負其有惟厥攸負



懷麓堂集  
曰可與大受與不在天受不在予夫苟不自愧違卹  
其餘維文之絕維名之揭彼利達者疇巧疇拙地靈  
人傑維鄉邦之哲百世之下山不泐水不齧茲惟張  
東白公之穴

明故錦衣衛掌衛事都指揮使贈榮祿大夫右

軍都督府都督同知葉公墓誌銘

公姓葉氏諱廣字大用世錦衣衛爲總旗公少孤賴  
母范夫人鞠成之俾學書藝旣代役識者曰是非行  
伍中人領東廠緝訪事詳慎不泄成化八年以功擢  
試百戶蒞本所事屢奉勅出勘重獄所在餽贐悉辭

弗納江西藩臬賦詩贈之遠東武臣奏其地有金鑛  
珠池公奉命往勘躬涉境外察其姦事遂寢東人德  
之至今領本衛緝訪事事必核有劇盜詔捕甚急或  
陰跡所在以告公曰盜固有罪待其自犯爾何得爲  
邏者後自訪得之有校尉緝越城盜公疑之執不變  
公曰若殺此人後獲真者柰何不數日真者果獲二  
十一年實授爲百戶明年遷副千戶理鎮撫司刑鞫  
讞精密有姦婦掣毒假婢手中其夫槩坐死公以婢  
不知情辯釋之有校尉誣執平人爲盜反坐執者都  
察院守者相仇殺逮繫百餘人戶部進內藏銀數失



懷麓堂集  
實繫者亦衆皆止坐罪者自餘平反縱釋多至不可  
計弘治五年擢署指揮僉事明年本衛缺員兵部薦  
其名時孝宗簡在已久御文華殿親閱之命蒞衛事  
實授爲僉事總都城溝涂事人不敢犯出勘寧化王  
府疑獄務存大體勘大明川投獻地卒歸於民督捕  
中外盜賊獲數千百人而鄭村壩賊尤劇數年累遷  
都指揮僉事北山賊稱靠山王者勢甚獷方發官軍  
出捕比至則公已遣官屬擣其巢穴之一日矣上偉  
其功遷都指揮同知又勘外戚莊地及藩府儀賓獄  
皆集事而還今皇帝正德元年進都指揮使掌衛事

凡郊祀耕籍視學經筵諸大禮無弗預者減役從省  
浮費政令一新官屬皆改視易聽總緝訪事尤極慎  
重戒諭官校必以天道國法爲說詞議懇切人多感  
動蓋隱然有陰德焉八月二十五日卒於正寢距其  
生正統三年七月二十三日壽至七十朝廷特贈榮  
祿大夫右軍都督府都督同知命禮部諭祭者三工  
部治凡葬事皆異數也公器局魁碩敏而能斷遇事  
不苟動先自律威貸旁午屹然不爲動自壯至老未  
嘗少易又能體悉羣情不過苛刻用是獲於上下交  
口贊譽翕然同辭其卒也尤悼惜不置云銘曰有偉



懷齋堂集  
丈夫奮起朝列在帝左右職掌麾節使旌子子出徧  
藩臬命不我辱物不我涅嚴嚴詔獄法象斯設鞠明  
察幽靡枉弗雪衝風激濤盤根錯節如截得濟如騰  
解結隨不失正剛不至折功名始終竟保完潔高門  
藏巢永樹閭閻外有佳城幽光不滅

明故武定侯郭公墓誌銘

郭公存忠自錦衣衛指揮僉事襲封武定侯越七年  
卒上輟視朝一日命禮部諭祭者三勅有司治凡葬  
事皆如制公之爲僉事也嘗試武舉有名然未甚顯  
會錦衣闕員兵部以公數人名上孝宗御文華殿親

閱之見公儀觀秀整進對明暢命蒞衛事每侍衛扈  
從必以目屬焉嘗參預廷鞫總都城溝涂事兼督工  
修治充殿試執事官出勘長沙衛獄詞涉藩府歸奏  
稱旨其爲侯也僉右軍都督府事領京營牧馬勘薊  
州牧場地捕北山賊屬若干人敵寇大同命充右叅  
將尋命簡京營兵別部以侯公易置旗鼓嚴爲肆練  
勇氣增倍後不果行乃上邊務六事累數千言都御  
史陳公道韓御史春交章薦之各極稱譽亦未及試  
也公雖生故家值業中落囊無餘貲惟積書數千卷  
凡天官時日戰守攻圍之法悉有指授以至堪輿醫



卜罔不究心公暇則詠詩作書開園蒔花尤好竹以  
賓竹自號大夫士過者談論窮日又不厭也事母致  
孝友誼尤篤貧而死者爲具棺斂人以是賢之獨其  
中所蘊蓄弗克大展齋志以沒識者又以是惜之公  
生景泰甲戌某月某日卒於正德丁卯六月十六日  
年五十四其葬則十月三日也子助奉公治命請予  
銘銘曰郭有封國在高皇世一門兩侯侯者再繼仲  
繼以恩伯繼以功三紀之後歸於大宗翼翼京營嚴  
嚴督府旣衷壯猶亦佐者武維時恬熙兵斂弗耀志  
在邊疆身則廊廟謂公旣試而有遺才公子公孫繼

繼其來附於先公是謂無忝幽光百世昭不可揜

明故山東萊州府知府進階亞中大夫致仕李

君墓誌銘

君姓李氏諱黎字從質其先望於隴西元季有諱成  
者居鳳翔國朝永樂中徙河間之任丘考諱溥登陝  
西鄉薦累官山東東昌府學教授贈儒林郎光祿寺  
丞生四子君其長也生而凝重不浮儒林公邃易學  
歷湖蜀秦魯間多所造就因以授君君補縣學生提  
學闈御史禹錫賞所爲文試必居首遊從至四十餘  
輩任丘士多業儒傳易者實自君始成化甲午舉京



闈戊戌登進士知上海縣賦訟叢沓持以鎮靜和不狎每有鞫問人稱爲明以外艱去民遮道攀送有下泣者服闋彼徵擢光祿丞越六年當弘治壬子遷少卿六年戊午擢知萊州府值歲屢歉撫煦凋瘵理疆界均力役捕刦盜六千餘人時勾稽屯地戎衛欲移患於民或議牧馬於萊又有獻地於衛藩者皆力爭以免招徠流徙與屬縣期約視多寡爲殿最旬月內復業者至數千人民稍饑輒發粟施粥活者尤衆暇則修葺學舍集諸生勵以行業萊人爲刻石頌德焉越八年不調君以子時已舉進士爲翰林編修乃

上疏乞歸吏部言其恬退可嘉宜進秩以示勸特陞山東布政司右叅政致仕明年得疾就醫京邸數月歸又明年病劇時亟欲歸省會孝廟實錄告成有日又朝廷將行黜陟之令君手書止之自制棺斂處分家務曰無以爲吾兒累也時憂甚弗暇他郵亟具疏以請踰月乃獲命比抵家君已逝七日矣君夙敦孝慕每見儒官輒加禮遇曰吾父嘗爲是也世所遺田宅悉讓諸弟羣從子女皆爲婚嫁處已慎密澹然無所利有治事才而爲寬厚所掩又恥自衒故鮮有知者時亦用家學顯才器甚偉所進未可量歸省事尤



汲汲若弗逮竟弗躬治命其志尤可哀也自狀父行  
以墓銘告銘曰駕於亨衢旣蹶復驅弗摧我車驅彼  
中流倏退以休式完我舟尺蠖之屈冥鴻之揭非我  
失得彼逐逐者其欲其舍無一非我得不在身有天  
考存以遺我後人

封孺人彭母李氏墓誌銘

婦職視所從爲貴賤然事在兩值或兩值而一貴者  
蓋亦有遺寵焉彭母李孺人之封實以大理寺正君  
諱銓初命爲評事其子縉累官禮部員外郎秩加顯  
而封號未及進故仍稱孺人而以先封故不得稱太

制也李氏出襄陽舊族與彭爲郡望孺人之父諱濟  
以國子生爲同安縣丞有惠在人寺正君之父贈評  
事真朴翁諱某聞李氏女賢聘以冢婦同安亦耳熟  
寺正君之材簡於諸生謂爲偉器議是以克合孺人  
孝敬勤儉皆出天性服食麤糲而奉祀修饋必豐潔  
嫺里窮乏有須輒應俯接卑幼無不意滿以去內外  
賢之生縉未彌月出事井臼手爲杵所傷裹以供役  
翁責羣幼弗代孺人謝曰婦職固是也寺正君舉鄉  
貢擢進士第旣授官孺人貴不廢業寺正君賞賑饑  
齊魯間蠲逋發陳招集流徙夙夜不暇給孺人留京



邱勤家政內外截截君子以爲有內助焉寺正君還朝道卒孺人哀毀後不能生既歸葬壹意教於市織幼爲膏火費緡繼舉進士授萊州府推官孺人實就養每訊獄聲徹屏韓輒爲廢食飲緡歸必問之故往戒之曰汝父之爲是物恒自慮獲譴及出賑活人多甚吾知其必有後也汝無亦爲後地乎緡被召爲兵部武選司主事孺人復至京邸後數年改禮部再命至今官而孺人歸已老不復出矣正德三年戊辰五月八日卒於家壽七十有四子三人緡其長緡子禮部所舉士也勤慎奉職不愧其父其徵銘也甚懇

而哀吾是以銘銘曰得於夫者以成其子優學爲仕平反爲理復爲禮官內則之軌惟所從故以與終始有藏在茲百世無毀

蕭芝菴墓誌銘

芝菴蕭君來自南實以子昂居京師就養五年乃卒已而厥配潘孺人亦卒昂將歸合葬奉兵部郎中李君源狀請予銘按狀蕭氏本蜀望仕宋居河南從南渡寓於閩國初有伯亨者嘗被召以疾辭不起賜歸錢塘給薪米數十戶終其身是爲君祖子敬號善寧居士隱於鄉是爲君父居諱鑑字克明芝菴號也生



而端慤長益謹厚寡言笑不喜戲劇遇事輒奮欲自立時家中落晝爲蠱幹夜歸誦讀不絕口業寔就裕事親志養婚弟嫁妹爲從子置田宅育諸甥如已子友有黃佐者同質于外各市官鹽若干引至桐江黃舟壞鹽盡覆君公所有予之黃負金爲所窘君亦代之償黃謝曰微公佐死久矣分水縣學生郎啟親喪不能葬君貸以漆山田十畝并其券折之杭州衛百戶杭華代職京師貧不自活君給以衣食復資而遣之其他周困振乏者尤衆晚好醫書得其突與以疾告者雖天寒暑必赴酬以金幣輒辭曰吾豈爲利計

哉鄉人無長少疏戚皆以號稱之曰芝菴長者也孺人同邑橋泉處士之女有淑質慧敏精女事能讀列女傳諸書比歸禮佐孝養治內無違則君喪哀甚忽夢君因大慟幾絕越數日竟不起惟昂一子以名醫被徵入太醫院供事內局比以進藥功擢御醫命下君已卒七日而孺人猶及見焉明年庚午三月三十日合葬於西湖葵井之原故爲銘銘曰蕭出內江始遷洛陽由閩逮杭廼居錢塘其業經書其術岐黃父教之良矧有義方老家於官全歸其鄉子職之勤矧惟顯揚龍泉之原山迴水長居也同堂窆也同藏有



懷麓堂集  
存不亡百世勿忘

明故封奉直大夫翰林院侍講學士劉公墓誌  
銘

封翰林院侍講學士劉公諱規字應乾舉成化己丑  
進士知浙江餘姚縣以父喪闋服改知湖廣麻城縣  
被簡爲監察御史左遷廣西鬱林州判官孝宗皇帝  
登極復敘遷爲江西新淦知縣以母老上疏乞歸養  
例弗許時其子春已爲翰林編修會上兩宮尊號恩  
當封乃棄職就封秩爲編修階文林郎暨今上皇帝  
登極復以兩宮尊號恩進封侍講學士階奉直大夫

壽七十三卒正德三年九月十四日也公性剛介不  
爲物撓在餘姚出納興革心計力作聞海堤圯亟爲  
修築患里甲苦供役手自籍記令里日出米二石餘  
則均於次日日省數倍重興學士經獎勵者多有名  
於時每賑饑必審實里戶高下以次給之民獲實利  
治獄必先矜恤隨事斷決不輕械繫而往往得其情  
狀病勢家請託每客至延坐後廳令羣吏左右侍皆  
莫敢出口以去然亦無怨也按察蕭僉事禎有戚屬  
出入爲需索公械送於蕭蕭謝之遂用是知公麻城  
差易治治又加昔故不勞而辦爲御史覈湖廣貴州



軍儲又按山東雖遭發姦伏而務平恕每慮因獄疑者必從宥法劾叅攻張盛爲所註補外未嘗色悔焉痛蚤失怙事母每飯必躬侍建家祠修世譜周贍貧族至老不倦蓋其居官不苟得而家積穀粟益饒裕其爲義舉以此尤嚴子教每語之曰居者爲孝仕者爲忠又語其仕者曰爾輩各有職職異而理同爾其識之長子春舉解元進士及第累官至學士賜四品服以學行聞台亦舉解元進士歷吏部員外郎今爲泰州同知孫鶴年復舉進士彭年舉鄉貢士科第之盛鮮與爲比其次曰  
年大年嘉年延年光祖繼祖

萬年皆宜人鄧氏出學士君在講筵史局方嚮用聞計將歸卜以明年某月某日襄事奉狀請予銘銘曰邑不我諳臺不我矜旋復棄之封君是稱科以三世教以一經矧有世守有行有名公名固存奚俟茲銘  
光祿寺少卿致仕進階朝列大夫李君墓誌銘  
去年冬予會抱犢李光祿南屏潘太史遂逸張西臺於家三君者金京產潘張皆予姻家李君亦少同筆硯張氏之好實與成之故也時李君已病歸遂劇越數日手書抵予若欲爲永訣者旣又以韻語屬予銘墓比再遣人候之則已逝矣予旣與遂逸會哭春初



有事於城南是夕夢焉乃悲而銘之李氏世居徐之沛縣後徵至京師隸錦衣衛籍君諱紳字縉卿其自號曰抱犢山人生而朗潤數歲能屬對人爭誦之嘗與予從監察御史岐山展先生遊並被甄賞君長子三歲顧淹一舉舉成化乙酉鄉貢連擢丙戌進士授行人司行人數奉使足跡遍天下聞見益博九載考最遷戶部員外郎郎中贈其父道明員外郎封母周氏爲太宜人並受誥命其所領司最劇書簿立辦時貴戚方盛有所干請力爲摧抑尚書李公敏薦爲光祿寺少卿意氣勃發遽罹猜忌會考覈京朝官以浮

躁淺露例調知山西之忻州忻君所嘗奉使地不欲往上疏乞致仕再上未允復疏曰郡縣之職非循良豈弟者弗稱茲以浮躁淺露之名而責其循良豈弟之政益亦難矣旣得請榜於坐曰五斗懶將雙膝屈三章乞得一身閒論者賞其志亦惜其才之不盡見也君舊居城南徙禁禦之西偏已乃復故業間歸沛置屋數楹歲取僦直忽燬於火又無他貿易歲費且不給持以勤儉未嘗見言面喜讀道書手自抄錄至盈箱篋或訝之笑而弗答與客觴詠投壺象戲或雜以諧謔文采逸發獨不及官府事予叩之琅琅可聽



懷麓堂集  
使得再試未必不嶄然穎脫也今天子登極詔進階  
朝列大夫至是卒嘗爲友索草書久弗致續未屬三  
日以幅楮抵予必得乃已交接之際益至死不易云  
銘曰少而同袍壯而同朝分官異曹獨老於韜豈才  
弗能實命不遭觴子於堂弔子於郊銘以葬之以全  
我交

贈淑人孫母錢氏墓誌銘

戶部尚書孫君志同之父之喪予嘗爲作銘及母錢  
氏喪銘弗及備意有所待也越十有九年自述行狀  
二千言以請予讀旣歎曰世所述先德有能詳且實

若是者乎按錢氏出鎮江丹徒祖忠謫戍湖廣始居  
安陸與孫同里開父廣於素菴翁雅厚遂許聘其子  
資政公孟恕逮事舅姑僉致孝敬體素弱始不習勞  
聞姑戒躬率婢使至窮日夜舅老病嗽晨起須茗飲  
淑人每夙興製茗姑喜肉炙躬執炊爨暑必近火自  
始嫁至垂老饗饋如一日親喪以舅姑在不敢過哀  
私居縞素定省必易服從事公性嚴肅雖細事必稟  
而後行有所怒則爲寬解家法不置乳母生五子六  
女皆自抱負紉綴至得婦乃已素好潔祭饗器必自  
滌每澣絺葛立夏日中以手熨俾燥濕得所用不



殄物衣雖久不垢敝裁剪繒錦不遺餘質積至數千  
片轉合補葺五色間錯粲然成文公弟妹七人處以  
和嫺不失辭色外睦兄姊孤且貧者遇之尤厚以暨  
諸媼戚皆然鄰婦死無棺假以佳木鄉黨患難亦周  
之以成公志公嘗謂曰吾婚嫁粗畢夫婦當偕老脫  
我得多筭則願分以益汝無相先後錢少公一歲後  
一年卒皆壽六十有一錢始封安人進宜人贈恭人  
淑人至夫人而公亦加贈如志同官資政者尚書階  
也戶部以郎中歸省而公喪在弘治甲寅歲踰年而  
夫人亦卒是爲乙卯正月十有一日十有二月二十

有九日合葬鷄籠山之墓異棺同槨乃戶部所親製  
以義起者蓋於是寡遺憾焉嗟夫女德不外見若戶  
部之孝且文能自紀述則雖馨歆跬步之細皆身教  
也由是敘銘之以與父德並傳顧不可哉銘曰有子  
如此無問其母以柔濟剛惟嚴教之輔惟德是似質  
固其有有潛弗彰澤故能久惟梧捲在口若書在手  
同堂合壙終獲其所我銘封石若篋其後



懷麓堂文後稿卷三十

誌銘

明故太常寺卿致仕進階榮祿大夫林公墓誌  
銘

內閣置中書舍人領制誥詔勅冊寶奏疏封草書篆  
之事地清職秘其貴者乃至三品顧不恒得若林公  
以成累官太常寺卿加正二品祿進階資善大夫致  
仕會今天子登極恭上兩宮尊號恩再進階從一品  
爲榮祿大夫蓋歷事四朝五十餘年年八十有一而  
卒遭際之盛僅一再見而已公諱章以成字也世爲



杭之錢塘人曾祖居義以上皆不顯祖仲英考森皆以公貴贈諫議大夫太常寺卿祖妣鍾氏母張氏皆贈封淑人公幼而敏悟藩司以大書薦於朝景泰初授中書舍人遂直內閣與衡陽謝伯寬金價遷禮部儀制員外郎天順初文簿叢沓會有大典禮事出倉猝方稽據故實公預具籍冊無所遺失李文達公殊愛之超遷禮部儀制員外郎成化二年九載秩滿遷山東布政司左叅議寄祿順天府朝謁仕事皆如故三年預修英廟實錄成擢太常寺少卿十二年秩再滿進爲卿以父喪服闋弘治初秩又滿始有加祿之

命四年憲廟實錄成時資勞愈積而限於格例於是祿再加而官不復進中間若大明一統志續通鑑綱目諸纂述事必預預必有賜金幣楮錕酒饌及諸時物多至不可數後以母喪服闋遂上疏請老始有進階之命顧以二子皆仕就養居京師累閱歲於是階亦再進衣鶴腰玉以歸歸未幾而卒公考妣及妻之喪皆賜葬祭并其生所置壙皆出異數蓋雖曹省卿佐苟非稱事應例亦有終其身而不得者斯亦可謂難已公生於宣德五年十二月十二日卒於正德五年二月二十二是年某月某日啟壙合葬其地曰



金鍾山之陽公素孝謹親疾必額天請代母老迎養於官每公暇不去左右友弟睦族急人患難其居官慎重不洩非疾病未嘗一日不入朝書法遒勁尤精鑒賞博聞習見能道先朝臺閣事歷歷可聽云乃爲銘銘曰錢塘之墟山水環礪鍾奇結秀造物有作匪物之作人亦孔卓或以行舉言揚藝擢公生其間自見頭角貌臞而茂骨清以確如崑斯松如嶼斯鶴既梁旣稱頰仰臺閣不矧不繳往返林壑斯人斯丘永以終樂

封阜國太夫人王母段氏合葬墓誌銘

正德庚午十一月十二日王母阜國太夫人卒上震悼遣中官致香幣楮鏹奠於城東賜第命禮部諭祭者十有四工部給米布諸物治凡葬事皆如制慈聖康壽太皇太后哀痛不自勝慈壽皇太后暨中宮皆有奠賻使者道相屬勲戚公卿以下咸往弔其諸子卜以辛未二月二十一日啟都城西玉河鄉阜國公塋而合葬焉乃奉吏部右侍郎兼翰林學士靳君克道狀請予銘按狀太夫人姓段氏世爲南京望族實誕我太皇太后憲宗皇帝旣登極正位中宮公官於京師累封榮祿大夫後軍都督府右都督於是有夫



人之命後長子源封瑞安伯進爲侯太夫人始加今  
封太皇太后在孝宗皇帝朝已進重闈太夫人恩禮  
加厚每入宮輒畱養踰月其家居子姓甥姪歲時燕  
會蟒衣玉帶以次上壽太夫人春秋雖高而聰明康  
健一一爲之盡觴無不意滿一時大家鉅室稱福壽  
者莫之敢望太夫人懷謙抱和貴不忘勤富不忘儉  
一錢尺帛不忍輕費每旦焚香禱家廟教子孫習詩  
禮親書史接賢大夫士夜則帥諸婦治女紅或漏下  
數刻乃已臨終忽呼家人取舊賜蟒衣服之旣又麾  
之曰是非送終服也蓋其年至八十有九而耿耿不

亂如此可謂賢矣於戲我國家以仁孝治天下推恩  
睦族施於外戚必仰體慈志厚於所生自孝廟以來  
暨今上皇帝率用是道若王氏兄弟並躋五爵官封  
祿養極庭闈之奉而敦詩悅禮屏奢去做滿而不溢  
君臣交盡自昔爲難阜國之教固始自蒙養而順守  
終善以延於無窮者謂非太夫人之訓不可也銘曰  
翼翼舊都大江之東巍巍聖母靈秀是鍾匪惟國禎  
家慶則有天實屬之亦假其手桓桓阜國家始用昌  
溫溫夫人不顯其光德稟純和氣分清淑儲休召祥  
亦孔之篤椒房之馨奕葉沾沾封誥煌煌甲第潭潭



衣有命服賜有玉食四十七年靡間朝夕先帝至孝  
今皇至仁老老之義由親逮尊生有寵章沒有賻卹  
從夫而終永奠幽室

明故榮祿大夫後軍都督府都督同知郭公墓

誌銘

都督郭公彥和世出武胄雅好文事厥妣朱太夫人  
暨厥配李夫人之葬皆徵予銘比公卒厥子琮復以  
治命請且奉戶部侍郎喬希大狀于公以朱氏故  
有媼好知之爲詳有與狀互發者乃敘其事以爲銘  
公諱鉉彥和字也初嗣指揮使住彭城衛成化乙酉

以廣西荔浦功進都指揮僉事己丑中武舉進同知  
月加俸二石贊畫團營方畧掌旗鼓號令名遂起丁  
酉領五軍營右哨戊戌備倭揚州諸府政尚鎮靜海  
道以寧丙午充漕運叅將弘治戊申寄祿錦衣衛千  
子充副總兵鎮廣西永安諸路種賊流劫府江公首  
議用兵分路進勦俘斬甚衆乙卯進署後軍都督府  
都督僉事佩漕運印充總兵官鎮淮安以廣西功實  
授俄復進都督同知降勅獎勵賜白金綵幣給誥命  
階榮祿大夫自復入淮熟練漕政悉官兵利病條貫  
便不使曲爲區畫借京倉銀爲般剝費以代市息浚



懷麓堂集  
通州官河二十餘里置減水壩用淺船般運以代陸  
輓歲各省數萬緡故雖專且久而官士愛戴不少替  
正德丁卯召還京師奉朝請佐理都督府事踰年乃  
卒昔人以轉輸功上戰伐謂兵食必相須乃克有濟  
公先兵後食歷試皆效其所謂食雖非赴急應變然  
持恒保大爲國家遠久計功實倍焉而論者猶歎其  
弗克盡用以沒此其人亦可知已公事母孝謹迎養  
嶺南桴鼓之暇不廢定省自奉簡約雅好慕士大夫  
下上論議圍碁雅歌閱古書名畫蕭然如書生云公  
生某卒某葬某謹爲之銘曰東巡海徼窮三吳南盡

百越踰蒼梧左節右鉞麾且驅但有號令無喧呼執  
俘獻馘多壯圖江淮之間財賦區億兵兆粟萬舳艦  
前叅後帥紛卒徒茨梁蠹地相撐扶論功校績已有  
餘豈以旦夕爭錙銖古稱宅相事有諸平陰之澤世  
不渝承家有子讀父書刻石紀德昭謀謨堂封合葬  
如來胥公生全歸死不孤彼不死者歸來乎

句容知縣劉生德機墓誌銘

有傳劉生德機器病者予曰德機質厚不宜病又有傳  
其死者予曰德機器局甚偉不宜死旣乃於喬侍郎  
希大得遂菴楊先生報哭曰噫真死矣蓋德機以內



弟學於予又學於遂菴遂菴以都御史致政居鎮江德機實在鄰壤得氣疾劇往就醫忽病瘍卒於丁卯橋別業遂菴爲制棺歛爲文祭之甚哀越數月喪至西郊葬於四里原世墓劉氏出順天之順義世居京師有名籍德機諱釗德機其字少從父至新昌歸父喪哭至嘔血爲京學生試久不售成化丙午予主考京闈德機聞命卽引嫌不就試弘治乙卯乃得舉又調禮部已未予再蒞春試復不就又三試皆北謁選吏部乃得知句容縣則正德戊辰也會歲大侵徭稅皆至詢民疾苦極力撫慰每京府牒下曲爲申告至

罹督責不少變民恃以爲命爭相慕悅道路播流聞京師部使者察其能致旌勞焉蓋自爲諸生三十年始得一命旣壯長益練習世故故所試輒效使假以時歲當大有所就而不意其遽止也悲夫德機每見予所爲文雖寸紙隻字不輕棄擲今其死雖不吾屬吾知其待予銘以暝也銘曰由豐而約志若可樂在仕而憂維民之瘼胡負之卓卓其成落落其施未博咎豈在學彼不死者惟文章是託我銘劉生以慰冥漠

亡女衍聖公宗婦墓誌銘



嗚呼吾女其竟至此極也吾女年十八嫁於孔氏嫁  
十有一年比歸寧已病纔兩月遽沒於此痛哉吾家  
故多難繼娶於贈太師成國莊簡公之女今封一品  
夫人朱氏生二女及一子兆同皆天惟吾女一人吾  
女眉目清湛儵然玉立意其非凡兒匹諸貴家多議  
婚盡却之弘治丙辰前行聖公南溪先生有子聞韶  
方冠屬其弟衍聖公東莊先生來議於京陳都憲玉  
娶於孔氏與二公通家又視予爲知己首爲請曰是  
宜室六十二代大宗子也簡雅而文予謂族大非耦  
且以遠故未應太宰屠公朝宗輩十人懇予不置予

要以三事曰吾女尚幼必三年後成禮禮必從儉孔  
氏子必令讀書皆應曰如約乃許之庚申東莊以聞  
韶至納徵之日少師守靜焦公寔相禮焉吾女素孝  
謹戀不忍別其兄兆先憐而送之既至奉舅姑食必  
親饋繼嫡姑袁夫人暨其姑江夫人奇愛之東莊卒  
聞韶既襲公爵而南溪又卒吾女居喪哀毀屏服飾  
相祀勤恪處諸妯娌和遜有節接媼戚無驕色婢僕  
數千指馭之皆有恩端居一室雖名園別墅未嘗一  
至屢娠弗字自置媵妾人以爲難比字一男輒不育  
其得疾亦以此恒念違遠父母泣涕無虛日或慰之



曰夫人爲聖門宗婦爵重族盛宜莫與比復何憾吾女曰貴富非不敢望但獲恒侍膝下死不瞑矣雖百方解之不能得甲子重建闕里廟成予奉勅代祀留其家十餘日乃返其母亦嘗還之還後愈益戀慕比歸雖病強笑語慰予及卒吾母麻太夫人哭之甚哀有歲制棺輒以予之殯斂皆如禮時聞韶適有疾請暫寓京療治上命醫診視遣中使賜酒肉蔬菜物及以喪告請再假數日上爲憫惻復特遣禮部官祭於殯行人祭於家仍給驛護喪令右司治葬事吾女未給封誥而得此蓋異數也吾女性剛慧其母口授女

孝經及名物之書意領領答皆畧能默記手寫家信作蠅頭字或爲韻語多思歸之詞聞者悲之念兄之孤女手製衣囊歲再三致至買女婢給之其歸寧凡七至屬續之際父母及夫皆在焉蓋其恩誼篤至若亦有陰相默會者獨念其二姑弗獲終養爲終身恨嗚嗚哉吾女年二十八生成化某年卒某年葬於溪墓之右銘曰孔氏世爵爲大宗子亦有宗婦式相廟祀代六十二婦氏維孳巖巖闕里生則歸之鬱鬱孔林死則棲之歸獲其配棲得其所女靈在茲永莫終古



明故資政大夫太子少保禮部尚書兼翰林院  
學士贈太子太保謚文裕白公墓誌銘

國朝父子宫至尚書者不過數人南宮白公其一也  
公諱鉞字秉德考選至舉正統壬戌進士官至資政  
大夫太子少保兵部尚書贈榮祿大夫少傅謚恭敏  
恭敏公之爲浙江布政也公生於杭成化庚子舉京  
闈第一甲辰舉禮部廷試第二人及第授翰林院編  
修弘治戊申同修憲廟實錄以內艱去癸丑同考禮  
部丙辰秩滿遷侍讀己未充經筵講官壬戌復同考  
禮部今上在春宮充講讀官癸丑修大明會典成進

侍講學士賜宴禮部尋修歷代通鑑纂要公亦與焉  
甲子考南畿鄉試乙丑以登極恩進學士加從四品  
充日講官丙寅開經筵賜白金絲幣車駕視太學賜  
坐葵倫堂丁卯命教庶吉士署掌院事擢禮部右侍  
郎日講如故尋改吏部遷左侍郎賜御製蟠龍諸詩  
賜纂要進尚書己巳賜玉帶庚午復命兼學士入內  
閣專典誥勅掌詹事府事以寧夏平賜賀功金牌加  
太子少保居月餘以疾卒年五十有七上悼惜不置  
贈太子太保謚文裕遣官諭祭勅有司治葬事公以  
公卿子習聞朝廷典故加之問學博涉強記詞翰清



美見稱於時而久職文字典禮無甲兵錢穀之寄故  
以此終其身成其所爲名其爲人重厚政尚寬簡不  
爲骯髒之行瑣屑之節值所難處寧稍爲遜避而未  
嘗遂失乎正其居家惇孝養與其兄錦衣千戶鎮弟  
國子生銓及銳鈔相友愛遇媼戚有恩上下交際不  
爲諂瀆有長厚之風焉其所著有怡靖稿若干卷公  
以某年月生某日卒辛未某日葬於南宮某原予與  
公同官久矣乃爲銘銘曰世紹科第家爲公卿我自  
得之匪祿廕是膺兄翹弟華業擅文武我以文試匪  
甲冑爲伍士則有學惟經史子曰我所以仕固其在  
千百禩以永終譽

封武定侯夫人郭母栢氏墓誌銘

武定侯郭公諱良旣卒之四年當正德辛未三月二  
十四日夫人栢氏繼卒其子嗣武定侯勛以喪告且  
乞假襄事上遣禮部官諭祭令有司啟壙合葬於是  
卜以五月十一日窆焉嗣侯乃告於予曰先公之喪  
辱惠之銘茲吾母不敢他請乃據以銘栢氏太保定



蠡縣望族純懿有內則父母慎擇配久之得武定公  
公喪父嘗嗣以年幼例給侯祿優養於家比長族人  
有爭襲者撓之遂罷侯封授郡衣指揮僉事祿不足  
夫人輒以奮具佐之恨不逮舅養事太夫人許氏備  
極孝敬食必甘旨衣必輕毳務得其歡乃已暨諸族  
鄙雖幼且賤亦施禮遇未嘗以貢盛加人公素好客  
夫人每見意治具不俟咄嗟而辦公亦以是參名弘  
治癸丑公被簡蒞衛事親交咸賀夫人獨曰祖爵未  
嗣憂方大耳丙辰公勘獄湖南夫人脫簪珥以充行  
橐公曰官有廩餼安用此夫人曰君素不妄取獨不

爲意外計乎辛酉許太夫人請於朝下廷臣議謂榮  
國公之功不可忘公乃得襲并給封誥夫人曰爲郭  
氏婦勤苦三十年而得此死不恨矣甲子公奉命統  
京營兵捕近畿劇盜所謂靠山王者獲其黨數十人  
夫人曰玉石俱焚自古難免人命至重未可忽也夫  
以女歸而能爲此言顧不難哉銘曰武胄之貴惟勳  
與戚一之旣希矧可兼得郭自開國爲公爲侯世媼  
帝家貴鮮與儔亦有嘉儷出於戚里內和外肅是謂  
媿美晨滌暮甘中有家饋春蘋秋蘩上有廟祭子職  
是共亦維婦賢世有恒道貴家所難生本從夫亦從



其死其從不死亦既有子我銘君侯亦銘夫人公有家傳系以斯文

翰林院侍讀學士徐君舜和墓誌銘

嗟乎舜和已矣舜和才甚敏氣勃勃不少降骨堅聳而神若有餘皆不宜死而竟至此也舜和姓徐氏諱穆舜和字也世爲吉安吉水望族幼時日記數千言十歲受易學十八廩食爲縣學生十九舉江西鄉試第二入國學已有名弘治癸丑予考禮部得其文奇之賜進士第二授編修嘗以親老引疾歸再閱歲已未同考禮部得一卷子時再出典試事力主之以寘

榜首遂魁大對乃今諭德倫伯疇也癸亥秩滿遷侍讀與修歷代通鑑纂要宋元論斷多其手出乙丑復爲同考得今編修董文玉爲首暨諸名士尤多今天子嗣位命克正使賜麒麟服頒正朔於朝鮮及境譯告國王不郊候迎詔不遵踈舜和援古義稽今制反復辯析皆如議王屢遣陪臣代質疑義剖析不遺凡所餽獻悉拒弗納其人皆愧服不置焉與修孝廟實錄撰述必當充經筵講官敷說有體戊辰以外艱歸時逆瑾肆虐惡諸翰林不爲禮屈聞舜和才諷以顯職不爲應比書成例進秩愜不肯或嗾之謂文士不



習世故適所同忌者十餘人陞調諸部屬俾擴充政務舜和雖憂居猶不免得南京禮部員外郎庚午闋服未至改南京兵部瑾既敗諫官以爲言請復舊制舜和始復爲侍讀今年命清理武官黃籍會肺病未差力疾入治事旋復大作比內閣以翰林春坊多闕員乃疏其有資望者請以次陞補舜和名在疏中報至歎曰命也翼日遽卒其子永年請於朝下吏部謂已得允命且疏其次所當得特予爲侍讀學士亦異數也舜和事親孝與其兄順美友而恭性不喜殺聞喪鳴聲輒不食至所交際乃翫麟不下博極羣籍於

凡國朝故實兵民利弊四方地里險易俗尚之薄厚以至人情物態常變真偽不同之故若指諸掌公堂廣坐言議英發畧無諱避顧非其人則噤不出一語語必悔之其所自負挾奮欲一試而幾會屢失久而不振然其退其進各義甚正校其所自得亦已多矣爲詩文雅贍有思致不蹈畦逕人以爲難有南峰稿若干卷舜和生成化戊子正月九日卒以正德辛未五月十一日卜以某年月日葬某山之原舜和之葬父也嘗徵予銘茲且葬永年揣其志若非予文不瞑者寔介倫董二君及易檢討欽之以請乃誌其性行



履歷而系以銘銘曰躍之鏗然鑄之凝然擊之錚然  
噫是何聲也一試而缺今再試而折兮倏爾而沒兮  
名之曰干將終不可滅兮

國子生潘元謹墓誌銘

國子生潘君元謹者鶴溪先生之子吾友南屏太史  
之族弟也年四十有一而卒先生傷之手書畀南屏  
以屬於予曰吾子不顯且弗壽若葬而無銘其何恃  
以瞑予嘗一再見元謹亦聞而悲之乃按南屏狀爲  
銘元謹諱實元謹其字生而沉靜不外露言若不能  
出口服食儉素絕不爲時好補景寧縣學生卓得家

學試有司屢弗利先生自進士累官知興化府致仕  
家居元謹禮侍色養代理家政無外內鉅細舉就條  
緒睦姻厚族尤重祠墓歲必修葺凡先生義所欲舉  
方有指授則已辦矣先生晚益韜戢卜居山中去家  
數里許元謹日一往見先生固止之乃增拓堂宇以  
娛適其心自是喜懼交集日不去左右比以年當貢  
戀不忍別先生曰此汝身事且吾幸健毋效兒女子  
戚戚爲也乃行廷考旣當赴南雍道清河得疾至楊  
州卒於興教寺之邸正德戊辰七月某日也葬某山  
原元謹好周人急訓導黃某得危疾爲視湯藥比死



經紀殯歛資其喪以歸邑人有被誣爲礦盜者將竄入他郡亦爲白之俾得復業有族子爲鄰邑人毆死其人以賂求免拒弗納論者謂其得父風槩使得沾一命必能濟物而竟止此惜哉銘曰身以親任志豈在祿親寔命我我其敢弗勗籍旣登矣名旣升矣將歸寧矣吁其亡矣旣教之仕復望其止其亡不死亦旣曰有子所慰親者庶其在此

明故太保保國公墓誌銘

正德辛未八月二十日太保保國公率上聞而悼之特贈太傅遣中官賜寶劍二萬緡命戶部給米五十

石布亦如之禮部論祭者十有四工部給棺槨凡葬事皆如禮制其子麒將葬於昌平北澤山世墓卜以某年月日從事奉陝西按察副使聶君瑄狀來請銘按狀公姓朱氏諱暉字東暘其先河南夏邑人也考諱永嗣伯爵威望著聞前後八佩印征荆襄延綏建州諸賊累功陞撫寧侯遂進封保國公賜號奉天翊衛推誠宣力佐理武臣特進光祿大夫右柱國太師兼太子太師追封宣平王諡武毅三代皆追封爲公弘治壬子公以胄子授錦衣勳衛弘治丙辰嗣公爵已未命統神機五千營兵馬庚申孝廟簡黜京營提



懷麓堂集  
督官兵部會薦可代者以公名上上親御便殿召內閣臣面議親書手勅命總三千營兼掌右軍都督府事辛酉命持節冊充榮王妃納徵正使是歲敵犯延綏命佩征苗大將軍印總諸路兵討之深入河套擣其巢會夜大霧苗遽驚遁獲舊勅二道及兵器牛馬諸物斬首三級別部兵亦斬首百餘以捷聞上降勅獎勵班師之日值當升殿特御奉天門見之壬戌閱視京營官癸亥命提督十二營仍兼總三千營事甲子孝肅太皇太后崩命督治山陵及別建饗廟會以災變辭優詔弗許復佩印出勅宣府大同邊寇亦有

斬獲還入居 加關上遣中官以牛酒犒軍賞賚甚厚尋加大保今 入子卽昨命侍經筵充正使行皇后納徵禮其所奉命若代祀郊廟社稷山川諸神其所受賜若蟒衣玉帶繡春刀皆出常格而金幣寶鏹食飲之類弗計也戊辰以疾告公具疏乞致乃許焉蓋再閱歲乃卒距其生正統戊辰正月十一日年六十有四公長身美髯器宇凝重寡言笑人莫測其蘊性素孝謹武毅享爵久公已逾五十出侍賓客猶執子弟禮凡韜畧紀律戰陳之事多所聞習嗣爵僅三載卽登大帥屢授節鉞敷歷中外諳練日深更化之初方



隆用舊而公竟弗起矣銘曰惟國有爵維公暨侯伯  
乃其亞實超品流公父嗣伯爲侯爲公公嗣厥封允  
惟父風虬髯長軀公有奇骨內掌營伍外總節鉞河  
曲之墟莽爲敵區公擣其虛靡堅弗驅凱還于朝意  
氣增重端居廟堂武偃弗用勳名始終亦孔之艱皇  
實命之其歸則天高門巍我下有駟馬簪纓蟬聯請  
視來者



